

古今滑稽联话

范左青

文硕阁

wenshuoge.com

目录

关于我们	3
古今滑稽联话序	5
古今滑稽联话一	6
古今滑稽联话二	10
古今滑稽联话三	15
古今滑稽联话四	20
古今滑稽联话五	24
古今滑稽联话六	26
古今滑稽联话七	30
古今滑稽联话八	35
古今滑稽联话九	39
古今滑稽联话十	43
古今滑稽联话十一	47
古今滑稽联话十二	52
古今滑稽联话十三	57

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

古今滑稽联话序

诗词联对，文章小道，余自幼喜之特甚。忆韶时夏日纳凉，有族长口述古人巧对数则，余喜而笔之，族长嘉之，乃为更诵谐联数则以去，是为余搜集韵语之嚆矢。厥后有闻见辄录之，其途渐广，兑凡有兴趣之诗词杂文无不辑录，名其册曰《珊瑚网》。十余年来积卷盈尺。枕中之秘，固未尝示人也。家贫，连年奔走，衣食卒卒，无须臾之隙可以整比公世。至客岁，始编诗词一部分，题名《古今滑稽诗话》，付海上会文书局印之，亦聊以寄托穷愁，消遣则个。出版后流行颇广，窃喜海内同嗜者之尚不乏人也。友人中多怱怱再出，乃复将所辑联对覆审一过，虽语涉纤佻，无关宏旨，而意趣所适，嬉笑怒骂，萃于一编，汰砾存金，略具类别。凡庆吊赠答、箴勉讽颂诸作，或言情说理、纪事状物之体，古人无心而作，余亦信手而录之。茶余酒后，浏览及之，觉其中掌故如数家珍，名胜可资卧游，莫不措辞隽永，对仗精工，益人神智也。夫楹联选本多矣，大都皆夸多斗靡，雅郑错见。本编一以清丽诙谐为主，意在令人触睹解颐，抛愁释倦，因隅曲而见大道，化臭腐以为神奇。盖时至今日，科学日繁，文字仅占一小部分，取足达意，不暇为高深奥赜之境，至联话则尤小之小矣。余编此集，亦只用单简之笔述之，不妄加评断。其有不忆出处者阙之，以示存慎，仍命名《古今滑稽联话》。用质鸿达，览而教之。嗟嗟，廿年搜辑，可存者仅得此数，不其难乎！回首韶年族长前红裤跳地之状，不禁感慨系之。栽青自序。

古今滑稽联话一

山阴杜尺庄先生煦，道咸间以名孝廉家居，潜心文学掌故，著书甚多，与宗越岷山人齐名。余于友人处得其寿钮云庄夫妇八十、五十合庆联，上下各自叶韵，极端庄流丽之致。钮氏世居城中诸善衡，时在大善寺设醮，故联中云云。是联友人得诸会稽沈翼心明经镜煌口述，明经积学之士，亦当日越中名宿，所传决无讹舛，然士林绝未得耳目也。联云：“云庄八秩寿，尺庄千晋酒，酒后开怀读庄子，逍遥游八千岁春秋；诸善五旬仙，大善百宝筵，筵前合掌颂善哉，兜率天五百尊罗汉。”

缪莲仙《文章游戏》载，某处财神庙一联云：“果然冷面寡情，只才是守钱奴，倒要与他几个；若使扶危济困，竟成了耗财鬼，休来想我分文。”过激之言，不可为训，不如《联语汇选》中所载某君一联蕴藉有味，联云：“只有几文钱，你也求，他也求，给谁是好；不作半点事，朝亦拜，夕亦拜，教我为难。”

昔人谓作怀古诗须翻陈出新，方能醒目，联对何独不然？李秀峰题岳阳楼云：“吕道人甚无味，八百里洞庭，飞过去，飞过来，一个神仙谁在眼；范先生殊多事，数十年寒士，偶为将，偶为相，万家忧乐空关心。”脍炙人口，有以哉！

吾乡爰社诗人某廩生五十自寿一联，诙谐入妙，人多诵之。句云：“嫖无闲，赌无钱，试为无赖，气力如绵，无过可寻，检点何劳蘧伯玉；进过学，补过廩，取消过后，南无结顶，平心一想，功名早于朱买臣。”

泰县某甲嗜鸦片，就家祠中设灯售吸。或赠联云：“与祖宗呼吸相通，方是香烟一脉；叹子孙诗书未读，也知灯火三更。”以烟、灯两字分柱，语谐而刻矣。

南皮张文达抚江苏时，值粤乱初定，国家方粉饰承平，士大夫相率从事于文宴。吴中为莺花薮泽，文达又知名士，东山丝竹，不减谢傅风流。有名妓张少卿者为文达所昵，为撰一联云：“少之时不亦乐乎；卿以下何足算也。”此联久已脍炙人口。后有勒省旃者，方伯少仲之公子也，风雅能诗，所眷妓亦名少卿，为联赠之云：“少之时戒之在色；卿不死孤不得安。”同一集句，一则风流自喜，一则倜傥不羁，两人身分口吻，亦各肖其所肖云。

曩阅孙诗樵《余墨偶谈》，曾见一联仿云南大观楼长联体，嘲嗜鸦片烟者，描写尽致，虽画不如。联云：“五百两烟泥，赔来手里，价廉货净，喜洋洋兴趣无穷。看粤夸黑土，楚重红瓢，黔尚青山，滇崇白水。估成辨色，不妨请客闲评。趁火旺炉燃，煮就了鱼泡蟹眼，正更长夜永，安排些雪藕冰桃，莫辜负四楞响斗，万字香盘，九节老枪，三镶玉嘴；数千金家产，忘却心头，瘾发神疲，叹滚滚钱财何用。想名类巴菰，膏珍福寿，种传罌粟，花号芙蓉。横枕开灯，足尽平生乐事。尽朝吹暮吸，那怕他日烈风寒，纵妻怨儿啼，都装做天聋地哑，只剩下几寸囚毛，半抽肩膀

，两行清涕，一副枯骸。”大观楼联系滇人张髯所题，一纵一横，大气盘旋，为古今有数之作。虽非滑稽，录之以便阅者对照：“五百里滇池，奔来眼底，披襟岸帻，喜茫茫空阔无边。看东骧神骏，西翥灵仪，北走蜿蜒，南翔缟素。高人韵士，何妨选胜登临。趁蟹屿螺洲，梳裹就风鬟雾鬓，更苹天苇地，点缀些翠羽丹霞，莫辜负四围香稻，万顷晴沙，九夏芙蓉，三春杨柳；数千年往事，注到心头，把酒凌虚，叹滚滚英雄谁在。想汉习楼船，唐标铁柱，宋挥玉斧，元跨革囊。伟烈丰功，费尽移山心力。尽珠帘画栋，卷不及暮雨朝云，便断碣残碑，都付与苍烟落照，只赢得几杵疏钟，半江渔火，两行秋雁，一枕清霜。”

吾乡陶稷山先生工北魏书，然不肯轻作。虞山蒋某乞得一联，至长跪以谢。有嘲之者云：“蒋子七言弯狗腿；陶公五斗憚虾腰。”

清宫某苑有两戏台联，比喻警切，思想新奇，口气之大尤得未曾有。相传均出某太监手笔，辞句亦大同小异。一云：“尧舜净，汤武生，桓文丑旦，古今来几多脚色；日月灯，云霞彩，风雷鼓板，宇宙间一大戏场。”一云：“尧舜生，汤武净，五霸七雄丑末耳，伊尹太公便算一只耍手，其余拜将封侯，不过摇旗呐喊称奴婢；四书白，六经引，诸子百家杂说也，杜甫李白会唱几句乱弹，此外咬文嚼字，大都沿街乞食唱莲花。”

近人汪笑依题戏剧学校联云：“尧舜老生，昌发武生，宋齐梁陈不过丑末耳，千古帝王，上台下台真似戏；经传正板，子史散板，诗词歌赋其犹二六乎，一堂教育，新剧旧剧学而优。”似从上联脱胎，然相去远矣。

江西万立钧知新阳县，以严酷闻，士绅苦之。其去任也，有某君构成一上联，方唯一君续之，送于万之舟次。联曰：“无恻隐，无羞恶，无辞让，无是非，政令虎苛，南武之民何罪；是混沌，是穷奇，是桀机，是饕餮，货贿狼籍，西江有子不才。”强对颇见力量。

徐侍郎某督学粤东，所取皆翩翩年少，不重文而重貌。当时粤人颇讽刺之，某君联云：“尔小子整整齐齐，或薰香，或抹粉，或涂脂，三千人巧作嫦娥，好似西施同入越；这老瞎颠颠倒倒，不论文，不通情，不讲礼，十八省几多学士，如何东粤独来徐。”

民国初元改用阳历，民间颇不一致，好事者于阴历元旦书一联悬土地祠，云：“男女平权，公说公有理，婆说婆有理；阴阳合历，你过你的年，我过我的年。”又同时某报载有一联云：“摄政王兴，摄政王亡，一代兴亡两摄政；中华国民，中华国土，千年民土本中华。”皆有讥讽，可以代表多数之民意也。然阳历纪年实较阴历为准，并此讥之，未免太守旧矣。

吴下某生，性嗜读而遇殊蹇，年三十犹未青一衿，人多嗤之。生发愤，遂于是年四月入泮，秋即连捷举于乡。其友缪心如赠以联云：“端午以前，犹是夫人自称曰；重阳而后，居然君子不以言。”脚缩“小童举人”四字，殊趣。

杭州某寺有弥勒佛联云：“年年扯空布袋，少米无柴，只剩得大肚宽肠，为告众檀越，信心时将何物施布；日日坐冷山门，接张待李，但见他欢天喜地，试问这头陀，得意处著甚么来由。”游戏三昧，所谓禅悦文字也。要之作此等联，亦只好如此。夫论道德，既不免于迂；论果报，又不免于诬。且二者皆非佛氏之极则也，舍此必谈空说有矣。而谈空说有，又嫌于陈陈相因，千篇一律也，故欲求新奇，不得不尔。

奉新姚鸿元，落拓不偶，开馆村中文昌庙，其右则冶工肆也。一游士赠联云：“设帐近洪炉，不怕诸生顽似铁；传经依古庙，方知夫子教如神。”语奇而切，字字如生铁铸成。

长沙杨卓夫赠妓小如联云：“小住为佳，得小住且小住；如何是好，欲如何便如何。”

朱建三生于七月七日，所居之里名百花巷，李笠翁寿以联云：“七夕是生辰，喜功名事业从心，处处带来天上巧；百花为寿域，羡玉树芝兰绕膝，人人占却眼前春。”清圆流丽，余最喜之。

笠翁芥子园门前二柳，门内二桃，风景清幽，任人游赏。桃熟时游人辄摘取之，因戏书一联于门云：“二柳当门，家计逊陶潜之半；双桃钥户，人谋虑方朔之三。”

“嘴尖肚大柄儿高，才免饥寒便自豪。量小不堪容大物，两三寸水起波涛。”此郑板桥借茶壶讥斗筲者之诗也，余已编入《滑稽诗话》矣。兹于友人处得其六十自寿一联，极风流潇洒，可作本编材料。联云：“常如作客，何问康宁，但使囊有余钱，瓮有余酿，釜有余粮，取数叶赏心旧纸，放浪吟哦，兴要阔，皮要顽，五官灵动胜千官，过到六旬犹少；定欲成仙，空生烦恼，只令耳无俗声，眼无俗物，胸无俗事，将几枚随意新花，纵横穿插，睡得迟，起得早，一日清闲似两日，算来百岁已多。”

康熙时广东诗僧某住海珠寺，交通公卿。寺塑金刚与弥勒古今滑稽联话环坐像，法身之大倍于他寺。滑稽者为题联云：“莫怪和尚们这般大样；请看护法者岂是小人。”

《熙朝新语》云：浙江乾隆丙子科乡试，两主考一姓庄，一姓鞠，庄颀颀而鞠不谨，有集杜句嘲之云：“庄梦未知何日醒；鞠花从此不须开。”鞠试毕回京，谓陈句

山太仆云：“杭人真欠通，如何鞠可通菊？”公不答，鞠诘之。公曰：“吾适思《月令》‘鞠有黄华’耳。”鞠大惭，未几死，人以为语讖。

又道光时某公分校礼闱，卷中有用毛诗“佛时仔肩”者，则批云：“佛字系梵语，不可入文内。”复有用《周易》“贞观”二字者，则又批云：“贞观是汉代年号，不可入文内。”因有为之对者云：“佛时是西域经文，宣圣悲啼弥勒笑；贞观系东京年号，唐宗错愕汉皇惊。”如此试官，真堪绝倒。

《三山笑史》云：有村馆延师课子者，故事每遇七夕，师若住馆，主人例设酒筵款之。师习闻其说，至七夕竟寂然，因呼其徒命对云：“客舍凄清，恰似今宵七夕。”徒不能对，以告其父，父知师意，笑曰：“我忘之矣。”因代对云：“寒村寂寞，可移下月中秋。”师笑颌之。迨至中秋，以为必设矣，而又寂然。因复命对云：“绿竹本无心，遇节即时挨不过。”其父笑曰：“我又忘之矣，奈何？”仍代对曰：“黑花如有约，重阳以后待何迟。”师无如之何，听之而已。讷至重阳，又寂然也，师不能忍，仍出对命徒云：“汉三杰，张良韩信狄人杰。”其父闻之大笑曰：“师误矣，三杰是汉人，狄人杰是唐人，师忘之乎？”师语其徒曰：“我实不忘，汝父前唐后汉记得许熟，乃一饭而屡忘之乎？”

有开烟室者，年五十始娶，而新娘则年仅十五也。某茂才为撰喜联云：“五十新郎，十五新娘，天数五，地数五，五位相乘，莫笑枯杨占大过；三两好土，两三好友，益者三，损者三，三生有幸，聊将罌粟请同人。”人争诵之。闻于彭宫保玉麟，邀入幕中，且为保举一知县云。

吾乡孙彦清先生德祖《题楹福墨》载：同治甲子，先生寓内家吴融钟氏，钟族有名澄四者，居邻村，业酿而好饮。以六十初度，招先生就面筵，酬酢方酣，出楹帖索致语。先生倚醉濡笔，戏问：“君寿当得几何？”澄曰：“二百岁可得耶。”因狂草三十四字云：“君是酒中仙，定此后称觞，还须一百四十度；我为座上客，似今朝大醉，何妨三万六千场。”主人得之狂喜，每见文人，辄举其词，津津若有余味云。

又某生儗于秋初纳名妓爱金为簪室，欲作联，苦二字难偶。先生走笔为成二十四言云：“爱月夜眠迟，不信爱卿胜皓魄；金风秋信早，好营金屋贮青娥。”组字熨贴，颇见匠心。

古今滑稽联话二

某县令居官清廉，萧然四壁。尝于除夕作联自嘲，其语颇趣。联云：“放千枚爆竹，把穷鬼轰开，数年来被这小奴才，扰累俺一双空手；烧三枝高香，将财神请进，从今后愿你老夫子，保佑我十万缠腰。”

咸丰间，江苏某君为发匪所获，匪首闻其有才名，留司笔札，且嘱题联。某君题曰：“说什么天主教，妄称天父天兄，绝天理，灭天伦，把青天世界闹得天昏，有一日天讨天诛，天才有眼；看这些地方官，都是地匪地棍，掘地平，挖地坑，将大地山河弄成地狱，还要抽地丁地税，地也无皮。”又大书一额曰：“斌尖傀卡。”盖讥其文不像文、武不像武、人不像人、鬼不像鬼也。匪首不解文义，见联中有天父天兄字样，以为必系颂祷之辞也，因大喜厚礼之。后遇其同类之识字者为之解释，始大怒，以被絮渍油裹某生而火之，名曰烧大蜡烛，亦云惨矣。

龙阳才子易哭厂，老名士中之鼎鼎者也。晚年酷好戏剧，属意于女伶鲜灵芝，诗词称扬，不遗余力，灵芝之名因以大噪。易死后，长沙某君戏代灵芝作挽云：“灵芝不灵，百草难医才子命；哭厂谁哭，一生只惹美人怜。”

贺新婚联用谐谑语，最恶作剧，然亦因人而异。如施诸优妓，则未始不可也。往年海上某舞台男伶某旦新婚，欧阳元贺以联云：“安能辨我是雌雄，想华月金樽，也曾脂粉登场，为他人作嫁；毕竟可儿好身手，趁椒风锦帐，莫把葫芦依样，舍正路弗由。”语极佻达而不嫌者，以题目同而人不同也。

天地间物，苟从乐观，大而日星河岳，固属可喜；小而虫禽草木，亦无一非乐景也。昔何燕泉幼时随父乘凉郊野，父命对曰：“蛙鼓萤灯蚯蚓笛，芳塘夜夜元宵。”燕泉对曰：“莺簧蝶拍鹧鸪词，香陌年年上巳。”是即其明证也。否则鹧鸪、蚯蚓之声，正离人思妇之所畏恶者，安得组成如此巧丽之对乎！

《葵轩琐记》载邗江旅壁一对云：“邹孟子，吴孟子，寺人孟子，一男一女，一非男非女；周宣王，齐宣王，司马宣王，一君一臣，一不君不臣。”

《古今巧对录》云：苏长公偕释佛印、妓琴操泛舟赏月。佛印酒酣，出船头撑篙为戏，琴操云：“和尚撑船，篙打江心罗汉。”佛印云：“佳人汲水，绳牵井底观音。”佛印又曰：“一个美人映月，人间天上两婵娟。”琴操云：“五百罗汉渡江，岸畔波心千佛子。”又一日，东坡与秦少游出游，见岸上一醉汉，骑驴摇摇欲堕，苏云：“醉汉骑驴，颠头簸脑算酒帐。”秦亦即景对云：“艄公摇橹，打恭作揖讨船钱。”

杨维桢与虞集至一妓家，见妓悬两镜梳头，杨云：“两镜悬窗，一女梳头三对面。”

”虞云：“孤灯挂壁，二人作揖四躬身。”

高季迪留姚孝广同饮，出一妓佐酒，貌甚明艳，姚戏之云：“虞美人穿红绣鞋，月下行来步步娇。”高代对曰：“水仙子持碧玉箫，风前吹出声声慢。”

解大绅与同僚在舟中饮酒，有青蛙跃出水面，同僚云：“出水蛙儿穿绿袄，美目盼兮。”时解方食虾，即举以对云：“落汤虾子着红袍，鞠躬如也。”

光绪间，阎丹初相国柄政，与张子青相国俱逾八旬。又乌少云、孙莱山二公亦年老，奉使涪鄂查办某事。都下有联云：“丹青不知老将至；云山况是客中过。”集句托讽，蕴藉可喜。凡作滑稽联者，当以此为正宗矣！

又李鸿章在相府，翁叔平馆度支时，都中亦传一联，嵌二公本籍县名，虽含蓄稍逊，而警策过之。联云：“宰相合肥天下瘦；司农常熟世间荒。”

《红楼梦》寓言八九，可有可无，指往事以实之已觉可笑，乃妓女中竟有袭其名号以相号召者，更无谓之极矣。然作赠联者，正可因此而得佳句焉。某君赠林黛玉云：“我为黄浦江边客；卿是红楼梦里人。”又有号贾筱樵者，本非袭名红楼，而所欢以其姓贾，且筱樵二字声同小乔，戏赠一联，组织更巧。联云：“姓名疑在红楼梦；夫婿曾烧赤壁兵。”

平湖令某，无锡人，有才名，而贪于货贿。巡方将劾之，怜其才，讽以对云：“平湖湖水水平湖，未履所欲。”令会其意，对曰：“无锡锡山山无锡，空得其名。”巡方颌之，遂罢劾。又某生以贗银市物，被控至官，郡守某出对云：“使假银，买真货，弄假成真。”生应声曰：“遇凶徒，见吉星，逢凶化吉。”守立释之。又有三女同通于一人者，事发到官，出对云：“三女为姦，二女皆从长女起。”盖欲重按其长也。长女对曰：“五人共伞，小人全仗大人遮。”官薄惩之。三对皆出于仓卒，有剖辨析哀之意，行虽无取，才固足称。所谓人皆欲杀，我意独怜者也。

唐伯虎召乩仙，戏出对云：“雪消狮子瘦。”乩即书曰：“月满兔儿肥。”又云：“七里山塘，行到半塘三里半。”乩云：“五溪蛮洞，经过中洞五溪中。”时刑部郎中黄暉在座，亦请对云：“羊脂白玉天。”乩云：“问丁家巷田夫。”众疑其妄，往试之，见一耕者锄黄土，问之，曰：“此‘鳝血黄泥地’也。”五字的对，众始骇服，谓为真仙云。按此对《聊斋志异》亦收载之，惟改鳝血为猪血，觉更工整。

《聊斋志异》中载谐联甚伙，如三朝元老之“一二三四五六七；孝弟忠信礼义廉”，上隐忘八，下隐无耻，颇滑稽含蓄。其他如狐谐之“妓女出门访情人，来时万福，去时万福；龙王下诏求直谏，龟也得言，鳖也得言”，仙人岛之“王子身边，无

有一点不是玉；龟翁头上，再着半夕即成龟”，又“戊戌同体，腹中只欠一点；己巳连踵，足下何不双挑”等，皆诙谐可喜，双关入妙，为吾滑稽联话之极好资料也。

陆文量与陈启东饮，陈年老发稀，陆戏之曰：“陈先生数茎头发，无计可施。”陈云：“陆大人满脸髭髯，何须如此。”陆又笑曰：“两猿截木山中，这猴子也会对锯句。”陈曰：“有犯，幸公勿罪：‘匹马陷身泥内，此畜生怎得出蹄题。’”相与抚掌，竟日而散。按此种恶谑，虽云箭在弦上不得不发，然总不可尚也。

嘉靖间，御史毛汝砺公宴，承差某斟酒太溢，毛曰：“承差差矣乎。”边廷实时为副使，亦在座，应声曰：“副使使之也。”四字上下异音，天然的对。

归安沈筠溪，少绝敏颖，有辩才。一日与弟偕出，值风雨暴作，过陈方伯兄弟邸中暂避。方伯戏曰：“大雨沉沉，二沈伸头难出。”答云：“狂风阵阵，两陈摇尾不开。”

明初某解元登第后，偕伴二人至某妓寮。妓闻其有才名，欲试之。适进茗者以不知客数，茶只两瓯，妓佯谢过，即二分之以进，曰：“三分分茶，解解解元之渴。”某解元应声曰：“一朝朝罢，行行行院之家。”或曰即解春雨事，不知然否。然对句殊不见佳，视妓当有逊色。

三衢人某，淫其里煅工之女，为工捉获，以铁钳钳去左耳，纵之。诸理斋为集成句一联云：“君子将有为也，载寝之床；匠人斫而小之，言提其耳。”

全椒王生，淳于髡之流亚也，敝衣垢貌，虬虱缘襟上行，效王景略故事。发一语，辄令人绝倒，人戏呼为王虱子。居之邻有寺，寺之僧亦好诙谐者，与王友善，时相嘲谑。一日僧摘瓜架下，王适至，出对曰：“葫芦种上声，葫芦种去声，葫芦种得葫芦用，葫芦架下摘葫芦，葫芦撞着葫芦痛。”僧笑应曰：“虱子长平声，虱子长上声，虱子长成虱子痒，虱子身上捉虱子，虱子掐得虱子响。”

西湖花神庙旧有联云：“翠翠红红，处处莺莺燕燕；风风雨雨，年年暮暮朝朝。”刘树屏仿之，题愚园花神阁云：“花花叶叶，翠翠红红，惟司尉香着意扶持，不教雨雨风风，清清冷冷；鳧鳧鸕鸕，生生世世，愿有情人成眷属，长此朝朝暮暮，喜喜欢欢。”后人更广其途，作报馆联云：“好好丑丑，事事详详细细；非非是是，天天说说谈谈。”茶馆云：“鸚鸚鸡鸡，个个兜兜搭搭；烟烟茗茗，朝朝碌碌忙忙。”梨园云：“武武文文，出出吹吹打打；男男女女，人人听听看看。”剃头店云：“暮暮朝朝，洗洗梳梳剃剃；停停歇歇，光光挖挖敲敲。”赠妓紫云云：“紫紫红红，花花叶叶；云云雨雨，暮暮朝朝。”

联对正格，不能有重复字，然亦有故意重复以见长者。某君五十自寿云：“内无德，外无才，并无好无恶，无是无非，更无点些些产业，直弄到无米无柴，五十载光阴荏苒；老有母，长有兄，并有妻有女，有子有孙，还有个小小功名，也算有福有寿，两三代骨肉团圆。”有无二字凡九重，垒垒贯珠，愈觉可爱。

寇莱公在中书与同列戏云：“水底日为天上日。”众未有对。会杨大年至，乃对曰：“眼中人是面前人。”

刘贡父善属对，王安石曰：“三代夏商周，可对乎？”贡父曰：“四始风雅颂。”荆公拊髀曰：“天造地设也。”

古时各省皆有地讳，莫知所始。如畿辅曰响马，陕西曰豹，山西曰瓜，山东曰膀，河南曰驴，江南曰水蟹，浙及徽州曰盐豆，浙又曰兽，江西曰腊鸡，元时江南亦号腊鸡，福建曰癩，四川曰鼠，湖广曰干鱼，两广曰蛇，云贵曰象。苟不知而误犯之，必为土人所厌恶矣。然亦有明知故犯，特以此为嘲戏者。成化中司马陕西杨鼎，与司寇福建林聪会坐，林以杨多须且年少，戏曰：“胡儿十岁能窥豹。”杨曰：“癩子三年不似人。”又河南焦芳过李西涯邸，见檐曝干鱼，戏曰：“晓日斜穿学士头。”西涯曰：“秋风正灌先生耳。”以谚有“秋风灌驴耳”之句也。又廖鸣吾戏伦白山曰：“人心不足蛇吞象。”伦曰：“天理难忘獭祭鱼。”又蜀中张士俨与广东王某善，每见辄曰：“委蛇委蛇。”王应声曰：“硕鼠硕鼠。”又李时尝以“腊鸡独擅江南味”戏夏言，言亦以“响马能空冀北群”七字报之。诸如此类，不胜枚举，要皆明知而故犯者，今则不闻有此矣。

一清客书门对云：“心中无半点事；眼前有十二孙。”有人续其下曰：“心中无半点事，两年不曾完粮；眼前有十二孙，六个未经出痘。”见者绝倒，真滑稽之尤矣。

万历中，湖广张孝廉某悦李屠儿之妻，方执手调笑，屠儿适归，乃扃户操杖击伤其胫。哀求得脱，告屠于官，称往渠家买盐被殴。县令已悉前情，因署一联于状尾而掷还之。联云：“张孝廉买盐，自牖执其手；李屠儿吃醋，以杖叩其胫。”

西湖花神庙旁月老祠，有金书旧联云：“愿天下有情人都成了眷属；是前生注定事莫错过姻缘。”盖集《西厢》、《琵琶》两院本成句也。

江苏某处有一庙，正殿奉关帝，左右祀火神龙神。彭文勤公过之，题句云：“心之光明犹火也；神而变化其龙乎。”就地起义，移他处不得。

广东省城真武庙有一联云：“逞被发仗剑威风，仙佛焉耳矣；有降龙伏虎手段，龟蛇云乎哉。”语气岸异，相传为苏文忠公手笔。

安徽育婴堂落成，陶云汀宫保题联云：“父兮生，母兮鞠，俾无父母有父母，此之谓民父母；子言似，孙言续，视犹子孙即子孙，所以保我子孙。”又各省育婴堂有旧传通用一联云：“子不子，亦各言其子，委而弃之，是可忍也，孰不可忍也，先王斯有不忍人之政；幼吾幼，以及人之幼，此而同之，有以异乎，曰无以异也，大人不失其赤子之心。”集语颇能浑成，不知作者何人也。

滇南赵某仕楚中为郡守，好出对句。一日见坊役用命纸糊灯，得句云：“命纸糊灯笼，火星照命。”思对未得。至岁暮，有老人高捧历日叩头献上，猛然触机，拍案大叫，对前句云：“头中顶历日，太岁当头。”老人大骇，误为怒己，叩头乞哀不止。守语其故，厚赏令出，然已饱受虚惊矣。岂真如俗语所云太岁当头欤？一笑。

泰兴令胡瑶昵一门子。坐堂时，见一吏挑之与偶语，令怒，欲责治之。吏漫云：“渠是小人表弟，叙家常耳。”令乃出对云：“‘表弟非表兄表子’，汝能对免责。”吏曰：“丈人是丈母丈夫。”令笑而释之。

唐原休受朱泚伪官，自比萧何，入长安日，首收图籍，时人目之曰“火迫酈侯”。宋南渡，有郭某为将，自比诸葛，酒后辄咏“三顾频烦”、“两朝开济”之句，屏风便面，一一书此。未几败于江上，仓皇涕泣而逃，时谓之“尿汁诸葛”。遥遥数百年，一将一相，正堪作对。

《代醉编》载：宋陈绎好为敦朴之状，时号“熬熟颜回”。熙宁中，台州推官孔文仲举制科，对策言事，有“痛哭太息”语，执政恶而斥之。时陈绎为翰林学士，语同官曰：“文仲狂躁，真杜园贾谊也。”王平甫笑曰：“‘杜园贾谊’，可对‘熬熟颜回’。”同官皆大笑，绎面赤而退。按熬熟、杜园皆当时之俗语也。

古今滑稽联话三

草木之名繁而难识，钱塘谢浩然尝集花名对若干则，博考群书，搜罗宏富。卒后其稿散佚，甚可惜也。余游杭时曾一见之，忆其中云：闽中有花号石独者，状似牡丹；又有号山单者，状似芍药，“石独”、“山单”，天然对偶。顷阅《人寿轩随笔》载宋翁点一对云：“拆破磊文三石独；分开出字两山单。”分合字面，嵌以花名，则更巧矣。

《七修类稿》载：明高皇帝好微行，一日遇一监生，同饮于酒家，问其乡里，曰：“四川重庆人。”高皇曰：“千里为重，重水重山重庆府。”监生对曰：“一人成大，大邦大国大明君。”高皇大喜，别去，明日召入，命为按察使。

又某日，高皇偕刘三吾入一村店小饮，无物下酒，出对曰：“小村店，三杯两盏，无有东西。”三吾未及对，店主对曰：“大明国，一统万方，不分南北。”高皇欲官之，店主以元人固辞，乃罢。

又《闲居笔记》云：南京有佛刹曰多宝者，高皇游幸，见幢幡上尽书“多宝如来”，高皇曰：“寺名多宝，有许多多宝如来。”时江怀素以翰林学士扈从，对曰：“国号大明，更无大大明皇帝。”越日骤升吏部尚书云。

李空同督学江右，唱名时有一生与同名，因出对云：“蔺相如，司马相如，名相如实不相如。”生曰：“魏无忌，长孙无忌，彼无忌此亦无忌。”奇巧不可方物，然亦幸而有此现成名字也。

《坚瓠集》曰：张桓侯翼德显应蜀中，时降灵附童子身，语祸福事应如响。有某生者不修，出联请对曰：“人是人，神是神，人岂可为神也。”童未尝学，竟应声曰：“尔为尔，我为我，尔焉能洩我哉。”事甚怪诞，未可为信，然本编论对，佳则录之，其他非所计也。

弘治中，泉州府学教授某，南海人，颇立崖岸。一日设宴于明伦堂，扮演《西厢》杂剧。翌日有无名子书一联于学门云：“斯文不幸，明伦堂上，除来南海先生；学校无光，教授馆中，扮出西厢杂剧。”某出见之，赧然自愧，故态顿去。

苏东坡与僧佛印、妓琴操常相往来，饮酒赓和，脱尽形迹。一日佛印过东坡，见琴操假寐纱橱中，戏之曰：“碧纱帐里睡佳人，烟笼芍药。”琴操云：“青草池边洗和尚，水浸葫芦。”佛印大笑曰：“和尚得对娘子，实出望外。”

陆浚明幼善属对，尝同陆象孙至父执某君处，父执方饮酒，与一人对局。因出对曰：“围棋赌酒，一着一酌。”浚明对曰：“坐漏观书，五更五经。”对弈人亦对曰

：“弹琴赋诗，七弦七言。”皆佳。

《倦游录》载：王荆公之子雱为太常太祝，有心疾。娶妻庞氏，未尝相接，荆公怜而嫁之。时工部员外侯叔献，荆公门人也，再娶槐氏甚悍。侯死，荆公恐其虐前妻之子，奏而出归母家。京师为之谚曰：“王太祝生前嫁妇；侯工部死后休妻。”事奇语奇，颇堪发噱。

弘治中，江阴曹野塘宰分宜，严嵩方成童，曹识而拔之，令与其子弘同治举业，宿食官舍。见严所握扇画鱼游景，构对语云：“画扇画鱼鱼跃浪，扇动鱼游。”严即对云：“绣鞋绣凤凤穿花，鞋行凤舞。”一夕曹偶思家，口占曰：“关山千里，乡心一夜雨绵绵。”严又对曰：“帝阙九重，圣寿万年天荡荡。”曹俱称赏，谓他日必成大器。一日偶与偕出，见城上睥睨，戏曰：“雉堞嶙嶙何所似。”严云：“倒生牙齿咬青天。”曹恶其奸险，遂稍稍疏远之。小时了了，大未必佳，其严嵩之谓矣。

永乐中，尚书夏忠靖公偕给事周大有赴苏松治水，同宿天宁寺。给事晨起如厕，行甚急，夏戏之曰：“披衣鞞履以行，急事急事。”周曰：“弃甲曳兵而走，尝输尝输。”

凡有数目字之对，往往相犯，难以见巧。“五行金木水火土；四位公侯伯子男。”天造地设也。其他则无如此现成矣。曩某报以“三鸟害人鸦雀鸽”征对，展期数月，无人应征。最后某君以“四灵除汝凤麟龙”对之，虽奇巧滑稽，得未曾有，然不免于矫揉造作矣。

又有移易偏旁谐声见巧者，曰：“移椅倚桐同玩月；点灯登阁各攻书。”

一士人以非辜至讼庭，守不直之，士人愤懑，大声称屈。守怒，出对曰：“投水屈原真是屈。”士人曰：“杀人曾子又何曾。”守喜，遂释之。

赠妓之联，都用嵌字。冠首曰凤顶，如红玉云：“红拂名留三侠传；玉环艳占六宫春。”二曰燕颌，如文玉云：“卓文君兴来贯酒；苏玉局老去看花。”三曰鳃颈，碧云云：“试将碧玉年华数；犹是云英未嫁身。”四曰鸳肩，文卿云：“交海内文章魁首；是花中卿子冠军。”五曰蜂腰，金喜云：“有躬肯许金夫见；解带应教喜子飞。”六曰鹤膝，玉兰云：“垂子乱翻雕玉佩；前身应是杜兰香。”七曰雁足，竹君云：“虚心到地方成竹；放胆如天只为君。”诸联或为特撰，或系集句，皆尚稳恰，然不如不露字面，摹取虚神，尤见用意。如梅仙云：“疏影暗香傍水月；琼琚玉佩响天风。”又：“世外岂无林处士；人间尚有许飞琼。”素琴云：“姹紫嫣红羞与伍；高山流水许知音。”雪卿云：“一年光景风花月；四海交游士大夫。”又姗姗云：“来到迟时思更苦；秀从骨里写偏难。”此以二字分论，而暗藏春色者

。更有俚俗之称，羌无故实，小名之录，从未搜罗，因难见巧，以无法之法为之。若阿二云：“顾影直输花第一；问名未到月初三。”大块头云：“但得文章容我假；何难地位出人多。”十五云：“蟾光最爱团圞好；鸾韵刚分上下平。”此是浑写。又有长联赠金珠云：“床头易尽，屋里难藏，是几许鲍叔分来，消受春宵时刻；掌上可擎，胸中有智，纵豪似石崇独得，须知秋露光阴。”玉琴云：“历冰霜劫，太璞能完，从知奇宝落人间，弗求鼎鼎盛名，自增卞氏山中价；作濠濮观，无弦亦妙，何意好风送天半，细领惺惺静趣，恍触成连海上情。”此亦分诮，尤觉工力兼臻，匠心独运。他如清季时某督抚创办妓捐，有嘲以联云：“大中丞借花献佛；小女子为国捐躯。”又有妓院名介福堂者，其鸨颇有积蓄，大启屋宇，倩人书旧额而题新联。某客书赠云：“现世为人，尽在两行脚下；半生食禄，都是一亩田中。”则皆诙谐入妙者矣。

吴柳堂侍御以立嗣事殉清穆宗，直声震天下。少时倜傥好狎游，计偕入都，日游行北里中。会试不第，留京候试，恋一妓不忍离，数月后资斧渐罄，座师某公劝令出城僦居九天庙，谓地僻远城市，可一意读书。侍御从其言，襆被往，甫三宿，郁郁不自得，俄然曰：“人生行乐耳。”反入城，仍宿妓家。金既尽，为妓白眼，困甚，犹不忍去。乡人士资以金，要之仍居九天庙，否将不与，遂不得已而去之，一时都人群呼之为吴大嫖云。初京师菊部向推四喜、三庆，后四喜不振，诸伶多散佚，余三胜自江南归，悉橐中金重新之。都人为语云：“余三胜重兴四喜班。”而难其对。或曰：“可对‘吴大嫖再住九天庙’。”

《壶斋随笔》载：江右某君精绘事，藏书甚富，有自题斋壁联云：“沧海日，赤城霞，峨眉雪，巫山云，洞庭月，彭蠡烟，潇湘雨，广陵潮，庐山瀑布，合宇宙奇观，绘吾斋壁；少陵诗，摩诘画，左氏传，马迁史，薛涛笺，右军帖，南华经，相如赋，屈子离骚，收古今绝艺，置我山窗。”想见图书四壁之乐也！

有僧名闲云者，与某庵尼尤月私相往来。好事者撰一联赠之，中嵌闲云尤月四字，运用入化，了无痕迹，僧竟不之觉也。联云：“此地迥非凡，闲听一曲渔歌，留云久住；夕阳无限好，尤爱三更人静，待月归来。”

咸丰间，一旗员某素不知文，奉命典试川省，评定甲乙时，飭差由城隍庙中迎神像数尊到院，将考生姓名一一书于竹签之上，插入一巨筐筒中，捧跪佛前摇之，如乡人赴庙求签者然。某签首落地，即以某为第一名，挨次递下，额满为止。不半日工夫，而甲乙以定。时人为撰一联云：“尔等论命莫论文，碰；咱们用手不用眼，摇。”语妙天下，末一字尤趣。

又康熙五十年辛卯江南乡试，副主考赵画山，与总督噶礼朋比为奸，大通关节，总督分贿至四十万金，事破伏法。是科正主试为左界园副宪必蕃，于衡鉴非所长，任赵所为而已，案定得末减。当时亦传一联云：“赵子龙一身是胆；左邱明两目无珠

。”

某司马罢官后，寓公湘上。尝眷一妓，不意该妓又与交好之某绅昵。一日遇于该妓家，绅有不豫色，遽曰：“仆有俚语，公能属对，当以此娟娟者相让。”遂忻然笑曰：“吃醋，坐冷板凳，把你当二百五。”司马应声曰：“咬盐，趁热被窝，管他仰十三千。”皆湘谚也。对仗工整，可谓天造地设也。

前清某孝廉有子，翩翩少年，缔姻于某大姓。会有好事者传播新郎是天阉，媒妁窘甚，邀同新郎沐浴，薄而观之，始释疑。成婚之夕，孝廉为撰一联云：“好事多磨，毕竟难磨成好事；登科有兆，即今预兆大登科。”亦近代结婚中一段佳话也。

嘉靖壬辰，北直学院胡明善待士惨刻，庠序甚怨。以私取房山所窠石为碑事发，拟侵盗园林树木罪，以石窠近皇陵故也。是年七月间彗星见东井，自辛卯至是已三见。有旨令大臣自陈，张少傅孚敬遂致仕。或为句以纪其事云：“石取西山，胡明善殃从地起；星行东井，张孚敬祸自天来。”又曰：“彗孛扫除无驻足；石碑压倒不翻身。”

储静夫弱冠游庠，不循矩矱。学官示以句云：“赌钱吃酒养婆娘，三者备矣。”储即续云：“齐家治国平天下，一以贯之。”后举成化癸卯解元，甲辰会试亦第一。

沈石田尝宴吴原傅宅，与陈启东同席。启东强之酒，石田固辞。启东云：“如辞饮，须对句可准。”时解元贺恩字其荣首席，启东云：“恩作解元，礼合贺其荣也。”次座为陈进士策，字嘉谟，石田因对曰：“策登进士，职当陈嘉谟焉。”合座为浮一大白云。以此下酒，当胜《汉书》矣。

祝枝山《猥谈》云：弘治中，夷使入朝，以一偶语请馆伴，对曰：“朝无相，边无将，气数相将。”典客不能对，李西涯教之曰：“天难度，地难量，乾坤度量。”夷使乃愧服。

白水滌者，上杭县之水名也。旧有句云：“白水滌头，白屋白鸡啼白昼。”未有对者。后潮阳林天钦修撰过此，问地名，得黄泥垄，因对曰：“黄泥垄口，黄家黄犬吠黄昏。”

浙江花提举与鄞县学官颜某交往，戏出对云：“鸡卵与鸭卵同窠，鸡卵先生，鸭卵先生。”颜曰：“马儿偕驴儿并走，马儿蹄举，驴儿蹄举。”

吴人马承学，好骑，善驰骤，同学钱同爱戏之曰：“马承学学乘马，汲汲而来。”马曰：“钱同爱爱铜钱，孳孳为利。”

刘李两生初次会面，互通姓氏，李曰：“骑青牛过关，老子李。”刘曰：“斩白蛇起义，高祖刘。”

祝枝山与沈石田出行，见一尼在田中收稻，祝云：“师姑田里挑禾上和尚。”沈对曰：“美女堂前抱绣裁秀才。”

陈洽八岁时随父出游，见两舟竞行，一迟一速，父命对云：“两船并行，橹速鲁肃不如帆快樊哙。”洽云：“八音齐奏，笛清狄青难比箫和萧何。”

某君偶成一对云：“冬夜灯前，夏侯氏读春秋传。”久未有对。后请乩仙叩之，对曰：“东门楼上，南京人唱北西厢。”

有两吏员候选典史，欲南者得北，欲北者得南，因相争。诤部命对曰：“典史争南北，南方之强与，北方之强与。”一典史对曰：“相公要东西，东夷之人也，西夷之人也。”

杨遂庵十二岁中举，至京师，某国公与某尚书同设席邀饮，席间尚书、国公齐递酒两盏，问曰：“手执两杯文武酒，饮文乎，饮武乎？”杨并受之，对曰：“胸藏万卷圣贤书，希圣也，希贤也。”

吴县陆天翼，幼聪颖，其父以资窘欲送为僧，其母欲送为道士，而天翼之志则欲读书。有人戏出对曰：“一子难兼三教，儒释道盍言尔志？”天翼对曰：“七篇能中五魁，解会状必得其名。”父异之，遂令潜心肄业，后入县学，有声庠序云。

明末辛巳、壬午间，江苏亢旱，赤地千里。当事者计无所出，惟督率僧道日祈祷于龙王庙，而天意难回，甘霖不作。滑稽者作一联云：“妖道恶僧，念退风云雷雨；贪官污吏，拜出日月星辰。”

某僧喜花卉，盆盎罗列，充塞阶除，更辟方塘十亩，植莲其中，花香如海，盛观也。一士人出对云：“河内荷花，和尚采来何处戴？”时寺中一柿树结实垂熟，士人摘一枚尝之，僧因对曰：“寺中柿子，士人摘去自家尝。”四叠谐声，贯穿不易。吾乡马水臣先生尝举一对，与此类似，上云：“霜降降霜，孀妇伤心双足冷。”偶忘下联，思之不得，余戏续云：“日食食日，术家述理十人歧。”当场水臣先生颇为赞许，但不知与原句相较何如耳？录此以质知者。

古今滑稽联话四

蜀南北山隐者，有挽袁世凯联三十副，嬉笑怒骂，皆成文章，无一泛语懈笔，健才亦史才也。兹摘录如下：“天下殆哉，溯人民国家四年以来，佛言不可说，不可说；先生休矣，问子孙帝王万世之业，子曰如之何，如之何。”“一世之雄，今安在也；六合以内，谁其恫乎？”“承运殿中悲往事；新华宫里赋招魂。”“满廷优遇，宠锡侯封，重泉倘见清德宗，自居何等；举国不容，逃归地府，冥路若逢梅特涅，定与同游。”“天意如斯，黄屋白宫成泡影；民情可见，苍生黎庶早伤心。”“由总统而皇帝，由皇帝而总统，为日纵无多，备收人世尊荣，虽死亦瞑目；是国民之中国，是中国之国民，仔肩原甚重，凡有奸魔出现，欲得而甘心。”“假冒共和虚名，别具肺肠同路易；倘讲君臣大义，有何面目见德宗。”“可惜好雄才，帝梦未成，定入幽冥为厉鬼；从今入地狱，仇讎犹在，应提诉讼向阎罗。”“总统府，新华宫，生于是，死于是；推戴书，劝进表，民意耶？帝意耶？”“鹿逐中原，浩劫遍延廿二省；龙飞何处，伤心惟有十三人。”“曹操云：毋人负我，宁我负人，惟公能体斯意；桓温谓：不能留芳，亦当遗臭，后世自有定评。”“国事如斯夫，回思政事堂中，大典宫仪何日备；死者长已矣，怅望新华宫内，宸旒御座化烟飞。”“劝进有书，劝退有书，葩经云进退维谷；造祸由己，造福由己，太上曰祸福无门。”“公生则人民死，公死则人民生，生死相环，互为因果；天视自我民视，天听自我民听，视听洞澈，不爽毫厘。”

又有王壬秋一联更觉诙谐可喜。其联云：“民犹是也，国犹是也，何分南北；总而言之，统而言之，不是东西。”此联袁氏未死时有所忌讳，仅传其上二句，卒后全联始传，脍炙人口云。

元宵赛灯，由来久矣。考吾越童谣，有“正月灯，二月鹞，三月上坟船里看娇娇”等语，想其由来亦已久矣。某书载康熙时张茂典先生有一对云：“月月有月，无如上元月上，银灯映月月增光。”无人能对，仍自续云：“更更点更，孰若长至更长，玉漏传更更递永。”观此，则清初此风亦盛也。

宋靖康之乱，有中涓挈一宫人南奔，侨寓平江，称夫妇，潜蓄美男，饰以钗钏，佯为婢，使与宫人生子。未几中涓死，宫人嫠居，偕婢抚其子。他年宫人又产女，邻人闻于官，讯之吐实，以闻上，诏给配，赐婢名宦成，遂洗妆而衣冠为丈夫。其后更有二子，皆举进士，长者为奎章阁待制，父母荣封焉。待制尝宴客，壁间悬三教图，或出对云：“夫子天尊大士，头上不同。”赵秘书彦中对曰：“宫娥宦者官人，腰间各别。”举座匿笑，待制引满觞之曰：“可谓一网打尽矣。”

元祐间，苏子由使辽，辽耳其名，思以奇困之。其国旧有对曰：“三光日月星。”凡以数言者必犯其上一字，久无有能对者。首以请于子由，子由唯唯，谓其介曰：“我能而君不能，非所以全大国之体。‘四始风雅颂’，天生对也。盍先以此复之

。”辽叹服。子由又徐对曰：“四德元亨利。”辽众睚眦，欲起辨，子由曰：“尔等谓我忘其一耶？谨闕尔口。两朝兄弟邦，卿等为外臣，此固仁庙之讳也。”辽出不意，遂骇服不敢辨。

《挑灯集异》载：江苏蒋焘幼聪慧，一日与父友武官某同游佛寺，父友指殿上佛像出对曰：“三尊大佛，坐狮坐象坐莲花。”焘对曰：“一介书生，攀凤攀龙攀桂子。”游毕出寺，武官部军牵焘衣问曰：“适对何句？”焘曰：“我对‘一个小军，偷狗偷猫偷芥菜’。”其捷于调戏如此。某书亦载其一对云：“冻雨洒窗，东两点，西三点；切瓜分片，上七刀，下八刀。”

一士馆于某姓，其家无僮仆，惟一女奴给使令。日久渐狎，执其手调之，女逃去诉于主人。主人因出对云：“奴手为拏，以后莫拏奴手。”士人对曰：“人言是信，从今休信人言。”

古对以文字分合者，如：“鉏麋触槐，甘作木边之鬼；豫让吞炭，终为山下之灰。”“半夜生孩，子亥二时难定；百年匹配，己酉两命相当。”“人曾为僧，人弗可以为佛；女卑为婢，女又可以为奴。”拈对之妙，颇见巧思。惟语助之字多同，似非正格。略貌取神，当求之于牝牡骀黄之外也。

董生某，逸其名，聪慧善对。十岁时其外祖诞日，试对曰：“六十八翁，有数十人，子妇女婿并外孙，称觴庆寿，便拚一醉何妨。”董曰：“百世一师，集三千士，颜曾闵冉及子夏，论道传经，继统万年无已。”时座客见壁上挂象棋枰，亦出对云：“车马象士并卒炮，都来护卫将军。”董云：“吏户刑工及礼兵，一齐辅弼圣主。”

漳浦赵从谊知独山州，州极荒凉，无仆隶，惟一里长充役使。因题柱曰：“茅屋三间，坐由我，卧由我；里长一个，左是他，右是他。”

《泊宅编》载：关子容为推官，才俊而貌丑，偶过南徐客次，见一绯衣朝士倨坐，关揖而问之，朝士疑为攫徒，诨之曰：“太子洗马高垂鱼。”良久乃转询关，关曰：“某之官：‘皇帝骑牛低钓鳌。’”朝士骇曰：“是何官位？”关笑曰：“且欲与君对偶亲切耳。”

一富翁乡居，求杨南峰书门对，此翁之祖曾为人仆，南峰题曰：“家居绿水青山畔；人在春风和气中。”上列“家人”二字，见者无不匿笑。又有王某者以铁匠起家，构华屋请南峰题额，大书“西斋”二字与之。或不解，问出处，答曰：“西字横看是个风箱，竖看是个铁墩。”

苏州刘逸少，年十一，文辞精敏，有老成体。其师潘阅，携见长洲宰王元之、吴县

宰罗思纯，二公试之，与对句，略不淹思。罗曰：“无风烟焰直。”对曰：“有月竹阴寒。”王曰：“风雨江城暮。”对曰：“波涛海市秋。”罗曰：“月移竹影侵棋局。”对曰：“风递花香入酒樽。”王曰：“一回酒渴思吞海。”对曰：“几度诗狂欲上天。”凡数十联，无不奇妙。二公惊异，闻于朝，赐进士及第。

瑞安高则诚明，少辩慧，善属对。年六岁，父宴客，明从桌边攫食，客曰：“令郎捷对，敢请试之？”曰：“小儿不识道理，上桌偷食。”明对曰：“村人有甚文章，中场出题。”客曰：“细颈壶儿，敢向腰间出嘴。”明曰：“平头梭子，却从肚里生繻。”及长，下笔成章，文名顿盛。

吴匏庵未第时，与友二人同至韦苏州庙祈梦。梦韦公揖入中堂，见右扉开转，左扉上有句云：“金马玉堂三学士。”觉而大喜。后匏庵联登会状，至礼部尚书，而二人者犹潦倒诸生。以为不验，复往祈之，梦至旧处，左扉已开，右扉上有句云：“清风明月两闲人。”觉而爽然，始悟前梦之被神给云。

《西园杂记》载：新淦范氏早寡，读书能诗。杨东里过淦村塾，见案上一对云：“墨落杯中，一片黑云浮琥珀；梳横枕上，半轮残月照琉璃。”问谁所对，学子不答，固诘之，曰：“家母。”东里惊异。后朝廷欲选女学师，东里在馆阁，因荐之，召入禁中数年。一日题《老妇牧牛图》云：“贵妃血溅马嵬坡，出塞昭君怨恨多。争似阿婆牛背稳，笛中吹出太平歌。”宣庙见之曰：“彼不乐居此矣。”封为夫人，厚赀而遣归之。

昔人以“成也萧何，败也萧何”对“一则仲父，再则仲父”，成语能此，亦云工矣。偶阅《万姓统谱》云：毛弘为给事中，慷慨激烈，奏疏无虚日。英宗厌苦之，有“昨日毛弘，今日毛弘”语，以对仲父句更为切当。

绍兴乙卯，以旱祷雨，谏议大夫赵霈上言：“自来祈祷断屠，只禁猪羊，今请并禁鹅鸭。”胡致堂在西掖见之，笑曰：“可谓鹅鸭谏议矣。闻房中有‘龙虎大王’，请以‘鹅鸭谏议’当之。”又明成化中胡汝宁请禁食虾蟆，时号“虾蟆给事”，更堪作对也。

《澠水燕谈录》云：王琪、张亢同在晏元献幕，亢肥大，琪以太牢目之；琪瘦小，亢以猕猴目之。一日有米纲至八百里村，水浅当剥载，亢往督，琪曰：“所谓‘八百里剥也’。”亢曰：“未若‘三千年精矣’。”又琪尝嘲亢曰：“张亢触墙成八字。”亢应声曰：“王琪望月叫三声。”

有木匠颇知通文，自称儒匠。尝督工于道院，一道士戏曰：“匠称儒匠，君子儒，小人儒？”匠厉声曰：“人号道人，饿鬼道，畜生道！”

苏小妹尝食爆栗，出对云：“栗破凤凰见。”言壳破而黄见也。东坡思之竟日，不能对，适佛印来，遂语之，对曰：“藕断鹭鸶飞。”言节断则丝飞也。佛印复曰：“正如‘无山得似巫山耸’，此亦同音两意。”坡曰：“可对‘何叶能如荷叶圆’。”子由曰：“不若云‘何水能如河水清’。以山对水，最为的对。”

又子由语东坡曰：“尝见鬻术者云：‘课卖六爻，内卦三爻，外卦三爻。’思之未易对。”一日兄弟同出，见戏场有以棒呈技者，云：“棒长八尺，随身四尺，离身四尺。”东坡曰：“此语正可还前日之对。”子由曰：“触机而发，诚巧对也。”

古今滑稽联话五

解大绅滑稽善对，尝与某君坐，某君曰：“有一书句甚难其对。”解问之，曰：“色难。”解曰：“容易。”某君不悟，促之曰：“既云易矣，何久不对？”解曰：“适已对矣。”某君始悟“色”对“容”，“难”对“易”，为之一笑。

王雪村善召乩，每吟咏有窘阻，则叩乩续之。一日与马鹤窗泛西湖，偶得一对，思久未续，鹤窗因请召之。乩乱动。问仙何名，书曰：“有事但问，问毕告名。”鹤窗曰：“有一对请仙对之：‘捧瑶觞南国佳人，一双玉手。’”乩即书曰：“趺宝座西方大士，丈六金身。”乩运如飞，俄顷复成一律。盖钱塘苏小小也。诗与本对无关，不录。

又某书载雪村一对云：“三个半钟钟半酒；一边双陆陆双星。”亦佳。

莆田陈师召性宽坦，夫人欲试之。会客至，呼茶，曰：“未煮。”师召曰：“也罢。”又呼干茶，曰：“未买。”师召曰：“也罢。”客为捧腹，时人呼为“陈也罢”。尝自翰林擢南京太常，门生会饯，有垂涕者。大学士李西涯戏曰：“师弟重分离，不升他太常卿也罢。”师召应声曰：“君臣难际会，便除我大学士何妨。”一座绝倒，服其敏给。

解大绅幼时随父执某公，游南京金水河玉阑干诸胜，成一对云：“金水河边金线柳，金线柳穿金鱼口；玉阑干外玉簪花，玉簪花插玉人头。”父执大奇之。

程墩篁以神童至京，李学士某欲妻以女，因留饭，指席间果出对曰：“因荷何而得藕偶。”程曰：“有杏幸不须梅媒。”李大称赏，遂以长女字之。又一日程与李西涯过采石，李得句云：“五风十雨梅黄节。”程即续云：“二水三山李白诗。”“梅黄”对“李白”，生动极矣。

长洲陈启东训导分水时，有人题桥云：“分水桥边分水吃，分分分开。”久未得对。启东过之，续曰：“看花亭下看花回，看看看到。”看花亭即在分水桥边，即景生情，诚佳对也。

李西涯字宾之，江朝宗字东之，其时翰林有句云：“宾之访东之，东之宾之。”无能对者。适陈启东谒选至京，吴文定即以叩之，答曰：“回也待由也，由也回也。”文定为之击节。又一日西涯思对“的颈葫芦”四字，未就，方浴而得“空心萝卜”，天生对也，喜而一跃，浴盆顿破。

唐守之出使朝鲜，其国王出对曰：“琴瑟琵琶，八大王一般头目。”守之云：“魑魅魍魉，四小鬼各样肚肠。”

“烟锁池塘柳”，古人之绝对也，句中嵌金木水火土五行。近人某君以“茶烹凿壁泉”对之，虽不敌原句，亦难能矣。又有“妙人儿倪家少女”、“西子颠倒为子西，须辨吴头楚尾”、“一张琴上七条弦，弹出五音六律”、“六木森森，松柏梧桐杨柳四山出出，昆仑嵩岱峨嵋”等句，则迄未有对。谁谓小道，可忽乎哉！

前清某都御史太夫人寿辰，有嵌一之十数目为联者，颇觉自然。联曰：“一品太夫人，备三从四德，五世同堂，恭值二宫齐介寿；六旬都御史，统七宾八师，九畴献寿，欣逢十月好称觞。”

某训导兴致风流，老而弥笃，有赠淡云、美云二女友各一联云：“莫嫌老圃秋容淡；除却巫山不是云。”“匪女之为美；于我如浮云。”

李文忠居相府，有自书一联榜于座右，识者谓真宰相语也。联曰：“受尽天下百官气；养就胸中一段春。”昔曾文正公在天津办理教案，未洽舆情，有撰一联以讽之者，曰：“僧去曾留，将人丢尽；因崇作崇，引鬼进来。”僧指僧王，崇则国戚崇某也。

戏台联滑稽者甚伙，余已收入不少矣。顷又于友人处得一联云：“看我非我，我看我我亦非我；装谁像谁，谁装谁谁就像谁。”一意化两，是白描之好手也。

前清戊戌变政，湖南陈佑民中丞暨徐学使两公，父子同被严议，时人以联语调之曰：“不孝等罪孽深重，不自殒灭，祸延显考，陈氏父子，徐氏父子；维新党末学肤浅，罔识忌讳，干冒宸严，礼部侍郎，兵部侍郎。”一作“陈陈相因，徐徐云尔，不孝罪孽深重，不自殒灭，祸延显考；孳孳为利，迟迟吾行，微臣末学新进，罔识忌讳，干冒宸严”。传闻异词，不知谁为当日原本。但第二联对句，孳孳、迟迟，肤泛不切，应以前联为胜。

嵌字联不露痕迹，已非易易。若嵌字而兼集句，且能浑成者，则尤难之又难矣。尝见天涯恨人赠别都中名妓春美联云：“独有宦游人，秋月春花等闲度；与君离别意，良辰美景奈何天。”嵌“春美”二字，天衣无缝，非所谓文章本天成、妙手偶得之者耶？

恨人又有赠雪珠一联，与上则工力悉敌。联云：“晓风杨柳，初日芙蓉，怜取眼前人，雪肤花貌参差是；歌馆楼台，秋千院落，不知身是客，珠箔银屏迤迤开。”

古今滑稽联话六

《坚瓠集》载古名人幼时巧对多则，皆奇妙难能，不可有二。何古人之幼慧耶，抑好事者之伪托与？姑选录之。一云：杨文忠公庭和七岁时，父月夜宴客，一客云“有三更矣”，一客云“半夜矣”，一客云“五更有一半矣”。时公亦在坐侧，客出对云：“一夜五更，半夜五更之半。”公曰：“三秋八月，中秋八月之中。”

又，王彝幼时同友人游佛寺，友出对云：“弥勒放下布袋，释迦难陀。”王曰：“观音失却净瓶，寒山拾得。”

又，松江吏胥徐某之子，幼聪慧，县令顾某试之曰：“花无百日红，紫薇独占。”对曰：“松有万年青，罗汉常尊。”令大喜，俾就学，后有声庠序。

又，刘贡父至一友人家，见群鸡啄食，友云：“鸡饥吃食，呼童拾石逐饥鸡。”刘对云：“鹤渴抢浆，命仆将枪惊渴鹤。”诘屈聱牙，可作一则拗口令。

又，白圻数岁时，其师见雷电交作，命一对，眼前景界造语甚奇，白圻对句亦工力悉敌。对曰：“电掣云边，火焰拽开金络索；月沉海底，碧波涌出水晶球。”

又，董文玉八岁时，一御史闻其名，招至舟中，曰：“久慕汝神童也，今试一对，果佳，当奏知朝廷。”因曰：“船载石头，石重船轻轻载重。”对曰：“弓量地面，地长弓短短量长。”御史叹赏，奏之朝，赐入太学。后榜眼及第。

又，顾九和幼时，随父出游，见新柳啼莺，父命对云：“柳线莺梭，织就江南三月锦。”对曰：“云笺雁字，传来塞北九秋书。”字字工稳，铢两悉称，即求之成人，恐亦未易多得。

又，王汝玉九岁时，值寒食节，师出对云：“冢上烧钱，灰逐微风成粉蝶。”王对：“池边洗砚，墨随流水化乌龙。”

又，万历时汉阳萧汉冲，年十五榜眼及第，仕至祭酒。性蚤慧，七龄时入官舫谒一贵官，出句命对云：“官舫夜光明，两轮玉烛。”对曰：“皇都春富贵，万里金城。”时贵官适有他遣，语去使曰：“尔去即来，廿四弗来廿五来，廿五弗来廿六来。”汉冲疑又出对，即曰：“静极而动，一爻不动二爻动，二爻不动三爻动。”贵官骇笑，深叹赏之。

又，诸大绶幼敏捷，一日师出对曰：“泾渭同流，清斯濯纓，浊斯濯足。”大绶曰：“炎寒异态，夏则饮水，冬则饮汤。”

又，一客指知府冯驯语某童曰：“冯二马，驯三马，冯驯五马诸侯。”童对曰：“伊有人，尹无人，伊尹一人元宰。”

又，朱亦巢所居相近田中有巨石，名石牛，旁有僧庵名石牛庵。巢幼时偶同父执某步至其处，某出对曰：“石牛庵畔石牛蹲，耕得石田收几石。”朱即对曰：“金鸡墩上金鸡宿，衔来金弹值千金。”以所居相近有地名金鸡墩也。父执又曰：“山童采栗用箱承，劈栗扑簏。”仓卒未就，适有农人提菱一篮经过，遂得句曰：“野老买菱将担倒，倾菱空笼。”

赭山湾、白塔洋、桃花渡、藕缆桥，皆宁波地名也，命名固雅，风景亦佳。清初某宗师岁考至其处，出对曰：“赭山湾上浪高低，鲁班鲁肃。”士莫能对，因自对曰：“白塔洋前风缓急，樊哙樊迟。”又曰：“一点红脂，俨似桃花渡口；数茎白发，浑如藕缆桥头。”未几宗师至绍，又以城中大善塔、小江桥成一对云：“大善塔，塔顶尖，尖如笔，笔写青天；小江桥，桥洞圆，圆似镜，镜照绿波。”又曰：“北海鲤鱼谢公钓。”四者皆本城桥名，无能对者，某君以城外山名“南山狮子鲍郎骑”对之，亦尚工稳。

卞焕若多须善谑。尝会客，座间有名智父者，卞戏之曰：“智父之头，宁为饮器。”智父曰：“卞胡之嘴，实是便壶。”一座绝倒，所谓出尔反尔也。

铁冠道人张景和，江右方士也，结庐钟山下。梁国公蓝玉携酒访之，道人野服出迎。玉以其轻己不悦，酒行，戏出对曰：“脚穿芒履迎宾，足下无礼。”道人指玉所持椰杯对曰：“手执椰瓢作盏，尊前不忠。”

徐尚书晞为郡吏日，偶随守步庭墀中，见一鹿伏地，守得句云：“屋北鹿独宿。”五字皆叠韵，颇难其对。晞代续云：“溪西鸡齐啼。”守惊喜，遂不以常礼待之。

又某书载，边尚书廷实多侍姬，妻胡氏通书而妒，常反目。一日尚书宴客，座有知其事者，戏出对云：“讨小老嫂恼。”边不能对，胡隔屏传片纸云：“何不曰‘想娘狂郎忙’？”边举以对，座客大哗。

甲乙二生，共饮红白酒而醉，甲曰：“红白相兼，醉后不知南北。”乙固寒士，因对云：“青黄不接，贫来卖了东西。”现身说法殊趣，非此不成的对。

胡梅林在浙，招致诸名士，如徐文长辈皆在幕中。一日胡与一同乡尊官周姓者饮于舟中，执壶者偶失手倾其酒，周出对云：“瓶倒壶胡撒尿。”盖胡幼有失溺之疾，周尝同学，故嘲之。胡一时无以复，左右急传入幕中，即为对就，私达于胡。及发船，故令舟人以柁作声，胡乃曰：“吾有对矣：‘柁转舟周放屁。’”对既工，适足答其侮也。

江湖术士有所谓召鬼演戏者，以八九岁小儿为之，忽尔才子佳人，莺歌燕舞；忽尔乱臣贼子，波谲云诡，啼笑悲欢，变态百出。嘉兴冯某尝召试之，至夜半，忽一童自称西楚霸王，持巨木而舞，势甚威猛。众恐肇祸，乃出一对难之曰：“西水驿西，三塔寺前三座塔。”童忽仆地，迟久复起，大言曰：“‘北京城北，五台山上五层台。’吾为此对，几游遍天下矣。”又半晌乃苏。

昔有“翰林学士浑身湿；兵部尚书彻骨寒”之句，以为佳对。明季一合肥知县，瘦且骨立，直指戏之曰：“合肥知县因何瘦？”一时未有佳对。适芜湖典史以解务至，其人多须，尹一见即云：“芜湖典史怎多须。”直指大笑。

尝见村庙戏台一联云：“逢场作戏，把往事今朝重提起；及时行乐，破工夫明日早些来。”集句颇佳，然村庙戏台，未必日日有戏，下联尚未恰妥也。若移而置之戏馆中，则可矣。

又某处云：“六礼未成，顷刻洞房花烛；五经不读，霎时金榜题名。”似较切当，然亦嫌于旧矣。

《耕余博览》载：虞集未遇时为许衡门客，虞有所私，午后辄出馆，许每往不遇，病之。书于简云：“夜夜出游，知虞公之不可谏。”虞归，续书其后云：“时时来晤，何许子之不惮烦。”

《雪涛谐史》载：一生员送广文节仪，辄用三分银子，广文嫌少，出对云：“竹笋出墙，一节须高一节。”生曰：“梅花逊雪，三分只是三分。”同时某广文因生员节仪只一分五厘，亦有署门一对云：“即使梅须逊雪，也该三分；唯其青出于蓝，故减一半。”则更一蟹不如一蟹矣。

万历中，太监孙隆织造至苏，甚作威福。尝春暮出游，一生从小巷出，误触前导，执之，讯知是生员，无可如何，始出对云：“手执夏扇，身着冬衣，不识春秋。”生曰：“口食南禄，心怀北阙，少件东西。”孙不敢轻待，放之。或曰生即吾乡徐文长先生，不知然否。

营业中之最秽浊者，莫如肥料公司，其臭恶之气令人不可向迤。乃有为之撰联者曰：“曾说佛头原可着；只愁名士不能担。”既典且雅，可谓化臭腐为神奇矣。曩阅咄咄夫《一夕话》，其中载古人围联多则。无独有偶，忆录之，一云：“古人欲惜金如此；庄子曾云道在斯。”又：“虎子难同器；龙涎不及香。”“莫道轮回输五谷；可储笔札赋三都。”“纳垢含污知大度；仙风道骨验方肠。”

太仓陆孟昭为刑部郎中，尝往一朝士家投刺，不书名，惟云：“东海钓鳌客过。”朝士知为陆也，亦递一帖云：“西番进象人来。”盖孟昭面黑齿白，人皆呼为象奴。

云。又丽水人金文嘲孟昭曰：“黑象口中含玉齿。”孟昭曰：“乌龟背上嵌金文。”亦趣。

戴大宾五岁时，往应童子试，同辈见其年少，谓曰：“小朋友就要做官，做到何官？”答曰：“阁老。”众戏之曰：“未老思阁老。”戴应声曰：“无才做秀才。”众哄笑，知反为所伤也。

江苏吴原墅面麻而多须，莆田王五峰面歪而眇一目。二人同部，王戏云：“麻脸横须，羊肚石倒栽蒲草。”吴云：“歪腮白眼，螺壳杯斜嵌珍珠。”

某处三义阁祀刘关张兄弟，一白面、一红面、一黑面，庄严威猛，颇有气势。其庭柱一联亦极端庄流丽，句云：“若傅粉，若涂朱，若点漆，谁谓心之不同如其面；忽朋友，忽兄弟，忽君臣，信乎圣不可知之谓神。”又某处关庙联云：“赤面禀赤心，乘赤兔追风，闯关中无忘赤帝；青灯观青史，仗青龙偃月，隐微处不愧青天。”复字错落有致。

弘治丙辰科进士有名孟春、季春、夏鼎、周鼎者，李西涯即席成对曰：“孟春季春惟少仲；夏鼎周鼎独无商。”

《广莫野语》载：周清诚八岁时，随其父与姨夫某同往游山，归途热甚，各卸衣。父出对曰：“两个姨夫齐脱衣，想是连襟。”诚曰：“一双女婿各拜节，果然令坦。”

古今滑稽联话七

一金陵词客侨寓吴门，家蓄粉头为业，俗名养瘦马。门上春联书杜工部“岂有文章惊海内；漫劳车马驻江干”句。偶开罪于一士，改为“岂有红颜惊海内；漫劳白镬贮门庭”粘于上，见者绝倒。

《夷坚志》载：汪仲嘉谪南康，尝招郡僚燕集，营妓咸至，有姓杨及李者，色艺颇佳，理掾主李，户掾主杨，席间时相戏嘲。理掾顾谓户曰：“‘尔爱其羊杨，我爱其礼李’，载之《鲁论》，无相笑也。”众大笑，而求所以为对者。时汪与请客米某对奕，一沈姓者从旁观局，汪曰：“我得对矣：‘傍观者审沈，当局者迷米。’”众击节。

一举子在旅店中，闻楼下一人出对云：“鼠偷蚕茧，浑如狮子抛球。”爱其奇而不能对，至成心疾而死，魂常往来楼中，诵此对话，人不敢上。一士子不信，独上居之，中夜果闻。乃代对曰：“蟹爪鱼罾，却似蜘蛛结网。”鬼遂长啸而去。

清初，宁波一秀士失馆，无聊闲走，偶闯府道。吏拘见，府诘其故，士以实告。因出对曰：“湖山倒影，鱼游松顶鹤栖波。”士曰：“日月循环，兔走天边鸟入地。”府大叹赏，即为荐馆。又某生亦失馆，蹈其辙闯入府道，府亦出对曰：“遍地是先生，足见斯文之盛。”生曰：“沿街寻弟子，方知吾道之穷。”府亦荐之。

一士人夜出迷道，假宿山家。其家有女方待字，窥士貌美，悦之，出对曰：“客官寄宿穷家，寒宵寂寞。”俱取宀字头也。士曰：“可以借得一点否？”女许之。乃对曰：“豕宰安宁富宅，宇宙宽宏。”女大喜，遂嫁之。按穷字从穴不从宀，对句亦甚平平，想好事者伪之也。

吴文之，初名济，少敏悟，与张济同学。客闻其才，出对曰：“张吴二济联床读。”文之对曰：“严霍同光间世生。”客善绘事，因曰：“画草发生，顷刻工夫非为雨。”文之曰：“灯花开落，须臾造化不关春。”客又曰：“画上行人，无雨无风常打伞。”对曰：“屏间飞鸟，有朝有暮不归巢。”皆妙。

施状元槃幼善属对，随父商于淮上，从师读书，主罗铎家。有都宪张某来，铎命其子与槃偕见。张出对云：“新月如弓，残月如弓，上弦弓，下弦弓。”槃应声曰：“朝霞似锦，晚霞似锦，东川锦，西川锦。”铎子遂不对。

《见只编》载：宁庶人濠怒一儒生，以铁笼笼之，置于后园。适园中凿池，庶人身自营度，因向宾从出一对云：“地中去土，加三点以成池。”宾从不能对，儒生在笼中对曰：“囚内出人，进一王而成国。”庶人大悦，释之。儒生自念：“囚内进王，语似戏弄，少选必追我矣。”因不至家而逸。未几追者果至家，而儒生不可得。

矣。

县官某入一僧寺，主僧独酌，已半酣矣，见县官入，前请曰：“长官可同饮三杯？”县官怒，斥责之。好事者为作一联云：“谈何容易，邀下官同饮三杯；礼尚往来，请上人独吃八棒。”

松江丘氏，尝以疾召乩仙。一坐客曰：“近有一对云：‘胆瓶斜插四枝花，杏桃梨李。’请大仙对之。”乩即书云：“手卷横披一轴画，松竹梅兰。”字字工整。

有冯某者，妻宋氏奇悍，冯畏之如虎。人或谐之曰：“无若宋人然。”冯应声曰：“是为冯妇也。”

松陵富人某，性鄙吝，绰号叫化子，康熙中援例加纳县令，需次得某邑；同时有某者以善讴著，谒选得某郡教职。里人为之对曰：“乞丐分符，教化大行乎郡邑；优伶秉铎，弦歌遍沐于胶庠。”遐迩传诵。

江苏顾岩叟先生宗孟、姚现闻先生希孟、文湛持先生震孟皆以文章节义砥砺一时，又范长白先生允临、陈古白先生元素及董思白先生其昌，皆工临池艺，著名于世。崇祯中，诸先生相继死亡，惟范长白先生独存。时为对曰：“顾宗孟、姚希孟、文震孟，三孟俱亡，莫非命也；董思白、陈古白、范长白，一白虽存，亦曰殆哉。”

歙县陈元弼，与蔡昭远论文，陈曰：“所苦腹中无料耳。”蔡即其语戏之曰：“陈元弼腹中无料。”陈曰：“蔡昭远背上有文。”

东坡与黄山谷在松下奕棋，偶风过，落松子于棋局中。东坡得句曰：“松下围棋，松子每随棋子落。”黄云：“柳边垂钓，柳丝常伴钓丝悬。”

又，明太祖与刘青田对局，亦传一对云：“天作棋盘星作子，日月争光。”刘云：“雷为战鼓电为旗，风云际会。”两人口吻，各肖其身分也。

明文皇帝在燕邸宴群臣，时天寒甚，文皇曰：“天寒地冻，水无一点不成冰。”姚广孝曰：“国乱民愁，王不出头谁是主。”盖乘间讽之也。

李东阳与友人听蝉树下，得句云：“蝉以翼鸣，不啻若自其口出。”友人云：“龙从角听，无乃不足于耳与。”《山海经》谓龙听以角不以耳，故云。

某县令传杨溥之父充役，父忧之。时溥年九岁，乃往县代父求免。出言英辩，令奇之，出对云：“四口同圖，内口皆从外口管。”溥云：“五人共傘，小人全仗大人遮。”令大叹赏，遂如所请免之。对与“三女为姦”则同，不知谁先谁后。

偶于友人处见上海某函授校《国文周刊》中，载有某君戏代岳武穆墓前所跪之秦桧、王氏二人互相埋冤一联，颇堪捧腹。代秦桧云：“咳，我纵丧心，有贤妇必不如此。”代王氏云：“啐，吾虽长舌，无奸夫何至于斯。”

太平天国洪秀全，尝自撰正殿联云：“维皇大德曰生，用夏变夷，待驱欧美非澳四洲人，归得版图一乃统；于文止戈为武，拨乱反正，尽没蓝白红黄八旗籍，列诸藩服万斯年。”又寝殿云：“马上得之，马上治之，造亿万年太平天国于弓刀锋镝之间，斯诚健者；东面而征，西面而征，救廿一省无罪良民于水火倒悬之会，是曰仁人。”颇有气势。充其量，可与拿破仑第一相伯仲。

自挽联多醒世语。吴才九先生云：“放眼千秋，说甚么天上人间，到此无非幻境；回头一笑，历多少尘途魔劫，而今还我前身。”应简人先生云：“忽然有，忽然无，纵勉成上寿百年，莫非做梦；何处来，何处去，倘果有轮回一说，更要伤心。”夫吾侪不幸而为人身，居娑婆世界，受诸苦恼恶浊，既牺牲其一生矣，倘轮回之说果有，则生生不已，死死无穷，是诸苦恼恶浊之无尽止也。伤心者，岂独一应简人哉！

又俞曲园亦有自挽一联云：“生无补乎时，死无关乎数，辛辛苦苦，著二百五十余卷书，流播四方，是亦足矣；仰不愧于天，俯不忤于人，浩浩荡荡，历数半生三十年事，放怀一笑，吾其归乎。”看似旷达，实则名心未尽也。

民国二年，北京某公团为清隆裕太后开追悼会，易实甫代统一党挽一联云：“本来生生世世不愿入帝王家，从黑暗中放绝大光明，全力铸共和，普造金身四万万；以后岁岁年年有纪念圣后日，为青史上现特别异彩，同情表追悼，各弹珠泪一双双。”

温生才、陈敬岳二烈士殡黄花冈时，有人挽之云：“生经白刃头方贵；死葬黄花骨亦香。”名句为烈士生色。

上海徐园有一联云：“无事棋酒著酌；有时琴诗弹谈。”可作俱乐部之普通联用。

某处弥勒佛联曰：“大肚能容，了却人间多少事；满腔欢喜，笑开天下古今愁。”可作修身养性之格言读。

萧山岳庙柱联云：“茹荼良善莫灰心，也须知六道轮回，今生作者来生受；漏网奸雄休得志，试请看两廊地狱，活时容易死时难。”又城隍庙云：“为人果有良心，初一十五，何用你烧香点烛；作事若昧天理，三更半夜，须防我铁炼钢叉。”善善而劝，恶恶而严，为中人以下说法，不得不尔。

又，吾乡曹娥庙一联，通明蕴藉，能使人人点头，相传是乩仙所题云：“事父未能，入庙倾诚皆末节；悦亲有道，见我不拜也无妨。”

祝枝山与沈石田观荷，见游鱼往来戏于叶底，祝云：“池中荷叶鱼儿伞。”沈云：“梁上蛛丝燕子帘。”

陈晋著九岁能诗，且善属对，客试之云：“杜诗汉名士，非唐朝杜甫之杜诗。”陈曰：“孟子吴淑姬，岂邹国孟轲之孟子。”

解缙七岁时随父出游，见一妓女吹箫，父命对云：“仙子吹箫，枯竹节边生玉笋。”对曰：“佳人张伞，新荷叶底露金莲。”

吴文泰欲造器，某工师为求大木，用两人扛归。吴出对云：“二人抬木归来，木长人短。”时丁逊学在坐，因对曰：“四口兴工造器，工少口多。”

陈起宗幼时随师出游，见马行沙上，师曰：“马足踏开岸上沙，风来复合。”对曰：“橹梢拨破江心月，水定还圆。”

一士人姓叶者，见僧舍荷花已结莲子，出对曰：“莲子已成荷长老。”僧云：“梨花未放叶先生。”

偶于香烟片中得一对云：“绿水本无忧，因风皱面；青山原不老，为雪白头。”喜其工，而不知出处。后阅《解人颐》，方知是沈义甫幼时对句也。

卢楠戏王云凤云：“鸟入风中，衔出虫而为凤。”王云：“马来芦畔，吃尽草以成驴。”

一学正与秀才争田，讼之官，官不直之，戏曰：“学正不正，诸生皆以为歪。”秀才对曰：“相公言公，百姓自然无讼。”

某教官老而穷，学中某姓兄弟二生，纨绔子也，嘲之曰：“穷老师，老老师，穷当益坚，老当益壮，穷老坚壮一老师。”教官答曰：“大少爷，小少爷，大则以王，小则以霸，大小王霸两少爷。”

昔人有嘲首县联云：“东奔西驰，满街上带了一群化子；前呼后拥，四轿内抬着两个债精。”“借债办公，债愈多而亏空愈大；择缺清累，缺甚苦而弥补甚难。”“论亏空原不要命；望调剂苟且偷生。”“问心天理少；掣肘地方多。”盖首县与上司衙门接近，科派将迎，首当其冲，往往亏累，不获已而搜刮民财，以轻己之负担。迫而使然，非尽首县之罪也。今则武夫擅政，挽粟飞刍，罗掘既穷，借债度日，

凡属文官，同感此苦，大可移赠此联也。然要其结果，终苦吾侪小民耳。噫！

西湖仙乐处酒家悬一联云：“翘首仰仙踪，白也仙，林也仙，苏也仙，我今买醉湖山里，非仙也仙；及时行乐地，春亦乐，夏亦乐，秋亦乐，冬来寻诗风雪中，不乐亦乐。”飘飘欲仙，不知何人手笔。

清高宗乾隆五十五年秋，上寿八旬，同堂五世，廷臣制联晋祝，皆不称意。惟纪文达联独邀奖饰，联曰：“龙飞五十有五年，庆一人五数合天，五数合地，五星呈，五云现，五代同堂，祥开五凤楼前，五色斑斓辉彩帐；鹤算八旬刚八月，祝万岁八千为春，八千为秋，八元进，八凯升，八方从化，歌舞八鸾队里，八仙会绕咏霓裳。”又高宗五旬时，某巨公上一联亦善颂善祷，辞曰：“四万里皇图，伊古以来，从无一朝一统四万里；五十年圣寿，自今而后，尚有九千九百五十年。”两两相较，自以文达联词藻华富，后来居上也。

某书载石达开少时题剃头店云：“磨砺以须，问天下头颅几许；及锋而试，看老夫手段何如。”确是大盗口吻。又某君亦有一联云：“虽然毫末生意；却是顶上工夫。”则纤弱矣。

某凉亭有卖浆酒者，一士过之，就解渴，称便利，为题一联而去。联曰：“为名忙，为利忙，忙里偷闲，吃杯茶去；谋衣苦，谋食苦，苦中作乐，拿壶酒来。”

海上有哑妓者，嫣然善笑。某君赠以联云：“多少苦衷，不忍明言同息妒；有何乐趣，勉将默笑学婴宁。”

“你何人，我何人，只因六礼相传，惹出今朝烦恼；生不见，死不见，倘若三生有幸，愿谐来世姻缘。”此淮安高某挽未婚妻联也。作此等联最难著笔，亲之不可，远又不能，此联依事直书，情文兼到，而又恰切身分，故佳。

程道州自题医室门云：“但愿人皆健；何妨我独贫。”大公无我，蔼然仁者之言也。

谢一夔与吕原饮，有歌而侑觞者，吕吹洞箫和之，谢云：“吕先生品箫，须添一口。”吕云：“谢状元射策，何吝片言。”

沈义甫同友人坐草堂，出对曰：“草堂中蛙唱蚓歌，和出鼓声笛韵。”友云：“雪地里鸡行犬走，踏成竹叶梅花。”

唐六如与张灵友善，二人皆善饮，每见必设杯酌，至醉乃已。时人传其一对云：“贾岛醉来非假倒；刘伶饮尽不留零。”

古今滑稽联话八

“日晒雪消，檐滴无云之水；风吹尘起，地生不火之烟。”“新月带星，银弹弓加金弹子；长虹贯日，绣球绦系锦球儿。”“水车车水水随车，车停水止；风扇扇风风出扇，扇动风生。”“绣鞋低罩绿罗裙，鸳鸯戏水；金钗斜插青丝鬓，鸾凤穿云。”皆古人切事切景之巧对也，以无关宏旨，略其事。

李西涯在翰林时，见一指挥祭神，出对云：“指挥烧纸，纸灰飞上指挥头。”指挥对曰：“修撰进馐，馐饷饱充修撰腹。”

某处有史、蒋二举人，好财好货，朋比为奸。一治酒请柴行经理，一演戏邀肉铺主人，盖欲联络奸商，以罔市利也。有作一联嘲之者曰：“史春元整席宴柴行，且救燃眉之急；蒋孝廉演剧邀屠户，遂成刎颈之交。”

《笑林广记》载：一塾师与一医生对对，医生之对句甚趣，兹节录之。塾师曰：“碧桃万树柳千丝。”医生曰：“红枣二枚姜一片。”塾师曰：“避暑最宜深竹院。”医生曰：“伤风应用小柴胡。”塾师曰：“丹桂香飘，遍满三千界。”医生曰：“梧桐子大，每服四十丸。”可谓语不离宗矣。

一乞丐与一老妓，穷极无聊，对对排遣。丐曰：“千舍万有，万舍千有，我的多福多寿老太太。”妓曰：“朝思暮想，暮思朝想，奴的知情知义小哥哥。”

某大令系孝廉方正出身，性好赌，莅任年余，日以樗蒲从事。一日正推牌九，忽中风倒毙。某君为撰挽联云：“举孝廉方正以为官，未及三年任满；翻天地人和而聚赌，可怜一命呜呼。”

前清一童生年逾花甲，犹赴院应试。学使怜其老，提堂命题，令其默经，意欲借此以成全之。诂老童记忆多时，竟不能成一字。学使笑赠一联云：“行年六秩尚称童，可云寿考；到老五经犹未熟，不愧书生。”

从前专制时代，属员之见上司，称呼卑鄙，恬不为怪。某书载一联云：“大人大大人，高升升到卅六天宫，为太上老君盖瓦；卑职卑职卑卑职，该死死入十八地狱，替夜叉小鬼挖煤。”可谓穷形尽相矣。

某甲尝于月夜出对云：“天上月圆，人间月半，月月月圆逢月半。”一八龄童子对曰：“今朝年尾，明朝年头，年年年尾接年头。”

某君弥留时自撰挽联云：“百年一刹那，把等闲富贵功名，付诸云散；再来成隔世，望这般夫妻儿女，切莫雷同。”又书一额曰：“这回不算。”

甲乙二人同乡同学，甲惧内而乙好嫖，常以此互相嘲谑。甲云：“嫖小娘生杨梅疮甘心。”乙曰：“怕老婆吃栗子块苦脑。”苦脑二字新。

相传太白楼有联云：“荐汾阳再造唐家，并无尺土酬功，只落得采石青山，供当日神仙笑傲；喜妃子能谗学士，不是七言感怨，怎脱去名缰利锁，让先生诗酒逍遥。”下联翻陈出新，未经人道，遂觉通体精神为之一振。楼中联句，向以王有才“吾辈此中堪饮酒；先生在上莫题诗”为最著，然如“诗酒神仙，天自梦中传彩笔；楼台花月，人从江上拜宫袍”，“狂到世人皆欲杀；醉来天子不能呼”，“脱身依旧仙归去；撒手还将月放回”，“公昔登临，想诗境满怀，酒杯在手；我来依旧，见青山对面，明月当头”，或写景，或言情，亦各有其妙处也。

又，吴山尊学士亦有一联云：“谢宣城何如人，只凭江上五言诗，要先生低首；韩荆州差解事，肯让阶前盈尺地，容国士扬眉。”或云楼系一守一令重葺，守姓谢，令姓韩，山尊特借以寓意云。果尔，则亦滑稽矣。

曾涤生国藩尝戏左季高宗棠云：“季子敢言高，与余意见常相左。”左云：“藩臣徒误国，问君经济有何曾。”嵌字无痕，针锋相对，至今犹传诵人口。

又，文正尊人有自述一联云：“粗茶淡饭布衣裳，只点福老夫享了；齐家治国平天下，那些事儿子承当。”封翁口吻，颇得优游之乐。

一塾师偕学生出关，夕阳未下，而关已闭。乃宿逆旅，出对曰：“开关迟，关关早，阻过客过关。”学生急切未有对，乃曰：“出对易，对对难，请先生先对。”不对之对，妙语解颐。

嘉庆时，一总督乌姓者，与新科翰林某同席。翰林年未三十，身短且瘦，乌戏之曰：“鼠无大小皆称老。”盖翰林不论年齿，人例呼为老先生，故特戏之。某翰林初若不闻，既乃指乌语同座曰：“龟有雌雄总姓乌。”

前清官吏，至清苦莫如学老师，而谐联亦以嘲学老师者为最多。兹又于友人处得两联云：“百无一事可言教；十有九分不像官。”一云：“动地惊天，脱裤打门斗五板；穷奢极欲，连篮买豆腐半斤。”

吴中汤某偕友人游于市，见酒肆悬一方灯，四面各书一“酒”字，盖借以为夜中之市招者。汤因之触发一对云：“一盏灯，四个字，酒酒酒酒。”时夜已深，击柝者出，友指汤曰：“吾有对矣：‘二更鼓，两面锣，汤汤汤汤。’”

某县令尝书一联榜诸大堂，曰：“爱民若子；执法如山。”然夷考其行，则贪墨滥法，与言大相反背也。有滑稽者夜偷书其联下曰：“爱民若子，牛羊父母，仓廩父

母，供其子职而已矣；执法如山，宝藏兴焉，货财殖焉，是岂山之性也哉。”

改成句移置他处，而能恰切不移者，如赠妓院春联，改“天增岁月人增寿；春满乾坤福满门”为“天增岁月娘增寿；春满乾坤爷满门”。又有改“万事不如杯在手；人生几见月当头”为“万事不如枪在手；人生几见日当头”赠嗜阿芙蓉者，亦巧而可喜。

戏场联须正喻夹写，方见游戏三昧之妙。全椒薛时雨慰农有一联云：“休羨他快意登场，也须夙世根基，才博得屠狗封侯，烂羊作尉；姑借尔写言醒世，一任当前炫赫，总不过草头富贵，花面逢迎。”

昔有某妇挽夫云：“无不开之船，荡桨扬帆，君已脱离苦海；有未了之戏，卷旗息鼓，吾今收拾残场。”超逸有林下风，求之男子中，得此盖少。

曩阅《时报》，载有老彭君戏拟《梁财神去思碑序》，并联五则，语甚诡谲，并兹录之。序曰：“昔魏武氏有言，大丈夫不能流芳百世，亦当遗臭万年。斯言也，邃古以来，惟舜与跖之伦足以副之。粤东梁公，性工狐媚，心切狼贪，民国初充税务处督办，猿氏倚为心膂。凡所施設，多骇听闻，略举数端，以备逸史：首创帝制，拥猿氏为八十三天大皇帝，一也；创设苛税，顿致家财八千万，都中尊为财神，二也；纸币停兑，为猿氏汇存美国六千万银，三也；发起十三省联盟，为帝制派保全禄位，四也。凡此四端，鹊网密布，四野既无遗财；兔窟深藏，一己更无后患，诚不负为昂藏七尺之大丈夫也。至于流芳遗臭，千载以后，二者必有一于此。余故论而著之，寿诸贞珉。匪惟表公德而系去思，正以愧天下后世之手揽利权，丝毫不知染指者。”联曰：“金穴深藏，铜山忽倒，财神千古，饿鬼千古；洪宪忠臣，共和败类，兴邦一人，亡国一人。”“我辈乃曾经搜括余生，碑口同镌，愿君子雕梁长踞；今日是再造共和盛世，野心未死，望继统金匱重封。”“丹宸设座，黄袍加身，八十天拍马吹牛，帝今何在；税创印花，币兴光纸，廿二省罗雀掘鼠，民不能忘。”“勃勃野心，贪永年安富尊荣，金钱筹画联盟策；哀哀黔首，沐大恩剥削搜括，膏血凝成堕泪碑。”“剥肤槌髓地无皮，只留得短碣千秋，翘首岷山齐堕泪；捉怪拿妖天有眼，忽听到令牌一拍，埋头港海倍惊心。”

甘肃某庙戏台悬一联，为左文襄手笔。左时已入相，写戏台亦自写也。联云：“都想要拜相封侯，却也不难，这里有现成榜样；最好是忠臣孝子，看来容易，问他做几许工夫。”

曾文正公挽名妓春燕一联，人多传诵。而其赠春燕一联，则知之者鲜。今并录之，挽云：“未免有情，忆酒绿灯红，一别竟伤春去了；似曾相识，知梁空泥落，几时重见燕归来。”赠云：“报道一声春去也；似曾相识燕归来。”语意略同，赠以简胜。

有人集骨董铺及药肆招牌成一联曰：“博古斋，揭表唐宋元明古今名人字画；同仁堂，发兑云贵川广生熟道地药材。”不假雕琢，自成排偶，所谓文章本天成也。

纪晓岚先生有贺牛姓者新婚联云：“绣阁并肩春望月；红楼对面夜弹琴。”暗切牛字，调侃不少。

烟台某观察赠名妓张小凤嵌字集句联云：“小生无宋玉般情，潘安般貌；凤凰非竹实不食，梧桐不栖。”

津沽女伶金玉兰，以妖媚之姿，演淫靡之剧，论者颇疑其不贞，实则犹是云英未嫁身也。往岁献艺宣武门，唱《玉堂春》一出，归寓即染猩红热不起，年仅二十余岁。一时顾曲大雅，题赠挽联，烟霏露集。然大都以蝶云褰雨之词，为怨蕙愁兰之句，滑稽轻薄，殊不称于玉兰也。惟江宁孙谷纫两联，一表其贞，一指其病，颂无溢美，哀而不淫，可称玉兰知己。一云：“顾曲我情移，最难绛树双声，碧玉毫无小家气；盖棺卿论定，杜尽铄金众口，木兰犹是女儿花。”一云：“玉堂春竟作尾声，这回宣武城南，真个曲终人不见；广陵散从兹绝响，莫过上阑门外，只余花落水流红。”

陕西省城有饭铺名“天然居”者，一过客出一对云：“客上天然居，居然天上客。”语巧回环，对颇不易。或曰：“人过大佛寺，寺佛大过人。”或曰：“图成地中海，海中地成图。”皆不敌也。

江西湖口石钟山，奉祀洪杨之役湘军阵亡诸将士。飨殿一联，系彭玉麟撰，豪迈堂皇，是大手笔。联曰：“忠臣魄，烈士魂，英雄气，名贤手笔，菩萨心肠，合古今天地之精灵，同此一山结束；彭蠡湖，湓浦月，浔江涛，匡庐瀑布，马当斜阳，极南北东西之画景，全凭两眼收来。”

安徽定远县城隍庙大殿一联，何维谦学政撰。上嵌五味，下嵌五色，对仗甚为工整。联曰：“泪酸血咸，悔不该手辣口甜，只道世间无苦海；金黄银白，但见得眼红心黑，那知头上见青天。”

京师女伶某于三月死，其生日则二月十一日也。某君挽云：“生在百花前，万紫千红齐俯首；春归三月暮，人间天上总销魂。”缠绵清丽，可称绝妙好辞。

古今滑稽联话九

湘乡王壬秋先生逝世，某君戏挽一联云：“先生本自有千古；后死惟嫌迟五年。”时论黠之。

清西太后七十寿，大兴土木，蠹蚀吾民之脂膏无算。时人撰一联刺之，语颇谐趣。曰：“今日幸颐和，明日幸南海，何日再幸古长安，亿万兆膏血全枯，只为一入歌庆有；五十割交趾，六十割台湾，七十更割辽阳地，念余省封圻渐蹙，每逢万寿祝疆无。”

顾嘉衡守南阳时，与藩司陈某不洽，使离任。及陈去，而继陈者为朱寿镛氏，知顾冤，又使回任。顾因题卧龙岗一联云：“陈寿何人，也评论先生长短；文忠特笔，为表明当日孤忠。”借题写感，句句说孔明，亦句句说自己也。

某太守，清苑人，曾令泾县，以贪酷闻。一日晨起，见厅事贴一联云：“彼哉彼哉，北方之学者，何足算也；戒之戒之，南人有言曰，其无后乎。”

郭嵩焘使英回国，巡抚粤东，醉心欧化，首创变法自强之议。其时朝野多不以郭说为然，传有一联云：“行伪而坚，言伪而辩，不容于尧舜之世；未能事人，焉能事鬼，何必去父母之邦。”

京都某道士羽化，滑稽者挽以联云：“吃的是老子，穿的是老子，一生到老，全靠老子；唤不灵天尊，拜不灵天尊，两脚朝天，莫怪天尊。”

宋蔡襄与陈亚友善，尝以谑语嘲其名曰：“陈亚有心终是恶。”陈曰：“蔡襄无口便成衰。”

虞长孺曰“天地一梨园也”，陈眉公曰“佛氏者朝廷之大养济园也”。某君戏演其义成一联云：“佛门大养济，将鰥寡孤独为僧尼，亿千万人，遍受十方供养；世界小梨园，牵帝王师相作傀儡，二十一史，演成一部传奇。”

某君斋壁悬一联云：“倩人抓背，上些上些再上些，真痛痒全凭自己；对客猜拳，著了著了又著了，好消息还在他家。”不知是何命意。

尤延之与杨诚斋为金石交。淳熙中，诚斋为秘书监，延之为太常卿，又同为青宫寮案，无日不相从。二人皆善谐，延之尝曰：“有一经句请秘监对，曰‘杨氏为我’。”诚斋应声曰：“尤物移人。”众皆叹其敏确。事见《鹤林玉露》。

《桐江诗话》云：元祐时，东平王景亮与诸仕族无成者，结为一社，专事嘲笑。士

大夫无问贤愚，一经诸人之目，即被不雅之名，当时号曰“猪嘴关”。吕惠卿察访京东，吕天资清瘦，语时辄以双手指画，社人目之曰“说法马留”，又凑为七字曰：“说法马留为察访。”久不能对。一日邵簏因上殿泄气，出知东平。邵高鼻卷须，社人目之曰“凑氛狮子”，乃对曰：“凑氛狮子作知州。”惠卿衔之，讽部使者发以他事，举社遂为齏粉。

戏场为雅俗共集之地，作联者借题醒世，语贵透彻。如：“问谁入世不谐容，泽粉涂脂，识破总非真面目；何物吓人真恶态，磨拳擦掌，看来尽是假威权。”“人情到底好排场，耀武扬威，任尔放开眉眼做；世事原来仍假局，装模作样，惟吾踏实脚跟看。”“老的少的，村的俏的，睁睁眼看他怎的；歌斯舞斯，哭斯笑斯，点点头原来如斯。”“你也挤，我也挤，此处几无立脚地；好且看，歹且看，大家都有下场时。”诸联虽灶妪亦能解也。亦有以含蓄见长者，如扬州某神庙云：“是耶非耶，其信然耶；秦欵汉欵，将近代欵。”又有对演戏人说法者，如某君题女戏园云：“本是好女儿身，慧业生成，编将绝妙好辞，为优孟衣冠，别开生面；岂竟如春婆梦，逢场作戏，揽取当前风致，数芳龄豆蔻，莫负韶华。”

昆山归元恭庄，明亡，佯狂肆志，与顾亭林炎武齐名。所居在丛冢之间，时号“归奇顾怪”。尝自榜其门曰：“入其室空空如也；问其人噉噉然曰。”又曰：“两口寄安乐之窝，妻太聪明夫太怪；四邻接幽冥之地，人何寥落鬼何多。”

李碧舫孝廉侨居佛山。咸丰甲寅，土寇毁其室，事平乃重葺之。落成日署门云：“修我墙屋；反其耄倪。”用成语颇切。

闻喜杨漪川侍御，在都时寓闻喜馆，榜其门曰：“何居我未之闻；见似人者而喜。”

休宁金正希先生，明末督乡兵与清战，不敌殉焉。其未达时，家贫苦读，尝题联曰：“读律书惧刑，读战书惧兵，读儒书兵刑不惧；耕尧田忧水，耕汤田忧旱，耕心田水旱无忧。”想见平日之学养矣。

黄石斋先生被执拘禁中，洪承畴往视之，先生闭目不视。及洪出，乃奋笔书一联云：“史笔流芳，虽未成名终可法；洪恩浩荡，不能报国反成仇。”字挟风霜，愧死长乐一流人物！

梁茝邻中丞引疾侨居浦城，购地数分，缚茅架屋。宅左有园，园中池上草堂为会客之所，悬手题一联云：“客来醉，客去睡，老无所事吁可愧；论学粗，论政疏，诗不成家聊自娱。”颇得优游林下之乐云。

吴让之书法入魏晋之室，累于家务。有寡媳甚悍，取求无厌，让之避居僧寺，有自

署一联云：“有子有孙，鳏寡孤独；无家无室，柴米油盐。”

楹联至百余字即多累坠，极难出色。偶阅《水窗春呓》，载湘阴徐海宗茂才眷一妓，号云香，益阳人，侨居省城。回家数月，迟之不至，后闻其死，作联挽之，多至二百余字，畅所欲言，无不如意，洵佳构也。联曰：“试问十九年磨折，却为谁来，如蜡自煎，如蚕自缚，没奈何罗网频加。曾语予云：君固怜薄命者，忍不一援手耶？呜呼可以悲矣！忆昔芙蓉露下，杨柳风前，舌妙吴歌，腰轻楚舞，每值酡颜之醉，常劳玉腕之扶，广寒无此游，会真无此遇，天台无此缘，纵教善病工愁，怜渠憔悴，尚恁地谈心深夜，数尽鸡筹，况平时袅袅婷婷，齐齐整整；不图二三月欢娱，竟抛依去，问鱼常杳，问雁常空，料不定琵琶别抱。然为卿计：尔岂昧夙根者，而肯再失身也？若是殆其死乎！迄今豆蔻香销，靡芜路断，门犹崔嵬，楼已秦封，难招红粉之魂，枉堕青衫之泪，少君弗能祷，精卫弗能填，女娲弗能补，但愿降神示梦，与我周旋，更大家稽首慈云，乞还鸳牒，或有个夫夫妇妇，世世生生。”

吴趼人挽妓女沈丽娟云：“此情与我何干，也来哭哭；只为怜卿薄命，同是惺惺。”拙朴语令人发笑。

某太守有一婢，貌美而慧，守欲纳之，婢峻拒。乃命对云：“小婢何知，自负红颜违我命。”婢云：“大人容稟，恐防绿顶戴君头。”对话颇趣，亦真言也。凡老夫娶少妇者，皆须防此一著。

某君赠妓如意联云：“都道我不如归去；试问卿于意云何。”语有神韵，非斫轮之老手不办。

一新婿挽岳云：“泰山其颓乎，吾将安仰；丈人真隐者，我至则行。”

顾家相《五余读书廛随笔》载烟馆联云：“贤者亦乐此；乡人皆好之。”“灯光不是文光，偏能射斗；洋药非同火药，也可开枪。”又某书亦载两则云：“重帘不卷留香久；短笛无腔信口吹。”“非翰林莫入此馆；是枪手乃能进场。”均尚雅切，尤以第三则集句为最佳。

某剃头店有联云：“大事业从头做起；好消息自耳传来。”又友人何斐斋为诵一联亦佳，曰：“到门尽是弹冠客；此处应无搔首人。”

民国初年，禁鸦片甚急，杭州《浙江潮报》征对云：“因火为烟，若不撇开总是苦。”其时国会议员党派纷歧，动生齟齬，余因对曰：“言义成议，傥无党见即完人。”及揭晓，共录五人，余列第二。第一名云：“采丝为彩，又加点缀便成文。”第四名云：“少女为妙，大来无一不从夫。”第三名已忘却，第五名似云：“舛木为桀，全无人道也称王。”

友人文会友，尝自绘小照一帧，传神维肖，甚宝之，欲配以联，得契尾成句云：“恐后无凭，立此存照。”而难其对，嘱余成之。余曰：“当今之世，舍我其谁。”强对不粘不脱，文大喜，称谢而去。

沈德符《野获编》载：明袁文荣炜撰世庙斋醮联云：“洛水玄龟初献瑞，阴数九，阳数九，九九八十一数，数通乎道，道合元始天尊，一诚有感；岐山丹凤两呈祥，雄声六，雌声六，六六三十六声，声闻于天，天生嘉靖皇帝，万寿无疆。”又一本云：“揲灵蓍之草以成文，天数五，地数五，五五二十五数，数生于道，道合元始天尊，尊无二上；截嶰竹之笛以协律，阳声六，阴声六，六六三十六声，声闻于天，天生嘉靖皇帝，帝统万年。”词句大同小异，传是夏贵溪言手笔。

《七修类稿》云：陈敏之木，天台人也，任徽州歙县训导，书一联于衙曰：“四万八千丈山中仙客；三百六十重滩上闲官。”天生切对也。

《敝帚斋谈余》云：尝于都下见一罢闲中贵，堂间书一对云：“无子无孙，尽是他人之物；有花有酒，聊为卒岁之欢。”用乔行简词中语，颇自然。

又某书载，嘉靖末年，南京城守门宦官高刚，于堂中书春联云：“海无波涛，海瑞之功不浅；林有梁栋，林润之泽居多。”盖谓刚峰、念堂二公也。宦者知重谏官如此，可谓贤矣。

《齐东野语》云：某孝廉家贫嗜酒，常至一村店赊饮，积负累累不能偿，店中人甚恶之。一夜天雪，孝廉又至，店中人诈言炉熄，以冷酒与之，且出对云：“冰冷酒，一点两点三点。”孝廉不能对，归家即病不起，死后化为怪鸟，仍往来村店左右，哀鸣对语。后学使者过，闻其事，为代对云：“丁香花，百头千头万头。”鸟遂长鸣数声飞去。

戏剧中演考试事，辄以一对了之，其语多鄙陋不足称。惟某出中一对，口气阔大，造语亦奇，因录之。对云：“玉帝行兵，雷鼓云旗天作阵；龙王开宴，山肴海酒地为筵。”

《稗史》载：宋洪平斋俞新第后，上史卫王书，自宰相至州县，无不指摘其短。大略云，昔之宰相，端委庙堂，进退百官；今之宰相，招权纳贿，倚势作威而已。凡及一联，必如上式，末俱用“而已”二字。时相怒之，十年不调。洪自署桃符云：“未得之乎一字力；只因而已十年闲。”

古今滑稽联话十

《簪云楼杂说》云：春联之设，自明孝陵昉也。时太祖都金陵，于除夕忽传旨：公卿士庶家门上须加春联一副。太祖亲微行出观，以为笑乐。偶见一家独无之，询知为阉豕苗者，尚未倩人耳。太祖为大书曰：“双手劈开生死路；一刀割断是非根。”投笔径去。嗣太祖复出，不见张贴，因问故，答云：“知是御书，高悬中堂，燃香祝圣，为献岁之瑞。”太祖大喜，赍银三十两，俾迁业焉。

泉唐丁剑南，余友也，斋中悬其祖乃文太守一联云：“车千乘，马千匹，强弩千张，统百万雄师，指麾如意；酒一斗，茶一瓯，围棋一局，约二三知己，畅叙幽情。”字写北魏，甚雄浑，与语相称。然必如孔明之纶巾羽扇、叔子之缓带轻裘，方能当之无愧也。

梁章钜《楹联丛话》云：乾隆中，每岁巡幸热河，必于中秋后一日进哨即木兰围场也，重阳前后出哨。蹕路所经，有所谓万松岭者，满山皆松，为重九日驻蹕登高之所，岁以为常。庚戌岁，上进哨时驻此，周览行宫，顾谓彭文勤公：“合将旧悬楹帖悉易新语，期以出哨登高时亲阅。”公连日构思，偶于行殿正中得句云：“八十君王，处处十八公，道旁介寿。”谓贴万松岭也，而难其对。因以片纸驰价，属纪文达公成之。文达公笑曰：“芸楣又来考我乎？”即令来价立待，封纸付还。文勤公启视，则已就余纸写成对语矣。句云：“九重天子，年年重九节，塞上称觴。”叹曰：“晓岚真捷才也。”回銮日，此联果邀称赏，各赐珍物数事云。

富阳猴岭，即王子晋吹笙处，旧有关帝庙，邑人葺而新之，复题联云：“此吴地也，不为孙郎立庙；今帝号矣，何须曹氏封侯。”孙权为富阳产，故出句云尔。

有作关夫人庙联者云：“生何氏，没何年，盖弗可考矣；夫尽忠，子尽孝，得不谓贤乎。”颇著于人口。按此事羌无故实，不得不用活笔。然据冯公山景所记关侯祖墓碑文，称侯娶胡氏，则夫人固自有姓也。事详《筠廊偶笔》，作者未之考耳。

燕子矶永济寺，有观音大士柱联云：“音亦可观，方算聪明无二用；佛何称士，须知儒释有同源。”殊有妙悟。

袁简斋《续同人集》，载有自嘲一联云：“不作公卿，非无福命都缘懒；难成仙佛，为爱文章又恋花。”

虎溪三笑亭有唐蜗寄先生联云：“桥跨虎溪，三教三源流，三人三笑语；莲开僧舍，一花一世界，一叶一如来。”

桂林吕月沧郡丞，随其父在戍所，十五年始赦归。成进士后，观政浙中，初知庆元

县，题大堂一联，现身说法，可作健讼人当头棒喝。联云：“我也曾为冤枉痛入心来，敢糊涂忘了当日；汝不必逞机谋争个胜去，看终久害著自家。”

溧阳史氏，自康熙丁未史鹤龄入翰林后，子孙相继，科第之盛，古今所罕。其宗祠中悬一联云：“祖孙父子，兄弟叔侄，四世翰苑蝉联，犹有舅甥翁婿；子午卯酉，辰戌丑未，八榜科名鼎盛，又逢己亥寅申。”

纪文达尝诵某君诗云：“浮沈宦海如鸥鸟；生死书丛似蠹鱼。”戏谓“此二句可作我他年挽联”。刘文清公云：“此惟陆耳山副宪足以当之。”未几而陆讣至，盖方被命赴沈阳覆校四库书，以天气骤寒，裘衣未到，冻僵于旅寓中也。时以为语讖云。

有集四书语为典肆联云：“以其所有，易其所无，四境之内，万物皆备于我；或曰取之，或曰勿取，三年无改，一介不以与人。”亦自稳切。

缪莲仙《涂说》云：一廪膳生得钦赐副榜，自书一堂联云：“说甚功名，只免得三年一考；有何体面，倒少了四两八钱。”四两八钱，谓廪禄也。殊趣。

纪晓岚《续消夏录》云：张明经晴岚，除夕前自题门联云：“三间东倒西歪屋；一个千锤百炼人。”适有锻铁者求彭信甫书门联，信甫戏书此二句与之。两家望衡对宇，见者无不失笑。二人本辛酉拔贡同年，颇契厚，坐此竟成嫌隙。所谓凡戏无益，此亦一端也。

又，《茶余客话》载：鲁亮侪观察自署一联云：“两间东倒西歪屋；一个南腔北调人。”词意略同，不谋而合。

《柳南随笔》云：昆山归元恭先生，狂士也，家贫甚，扉破至不可阖，椅败至不可移，则俱以纬萧缚之，书一扁曰“结绳而治”。又除夕，署其门联曰：“一枪戳出穷鬼去；双钩搭进富神来。”其不经多类此，时人呼为“归痴”云。

相传明末倪鸿宝诣吕晚村，吕揭一联于堂楣云：“囊无半卷书，惟有虞廷十六字；目空天下士，只让尼山一个人。”后吕诣倪，倪亦揭一联于堂云：“孝若曾子参，才足当一字可；才如周公旦，容不得半点骄。”吕爽然若失。两人之优劣见矣。

有延师课子者，于本宅近处另辟精舍一区，听馆师出入自便。其师好嬉游，日私出至城外某戏园，居停访之辄不晤。因书陶句于门云：“园日涉以成趣；门虽设而常关。”师归见之，即褰被而去。

弥勒佛终日嬉笑，作联者亦因之诙谐百出。杭州某寺一联，传诵人口，余已录于上

矣。顷又于友人处得邛州人余昂一联云：“终日解其颐，笑世事纷纭，曾无了局；经年坦乃腹，看胸怀洒落，却是上乘。”

某处药王庙戏台联云：“名场利场，无非戏场，做得出泼天富贵；冷药热药，总是妙药，医不尽遍地炎凉。”颇有慨乎其言。又某处关庙云：“顾曲小聪明，当日可怜公瑾；挝鼓大豪杰，至今犹骂曹瞒。”确是关庙戏台语，若移置他处，则不成话矣。

福州城外由江达海之路，以罗星塔为关键。塔据山巅，四面皆波涛汹涌，其由闽县达长乐，则必以罗星塔山下为暂泊候潮之所，盖海潮由此而分也。塔上旧有七字联，不知何人所撰。其句云：“朝朝朝朝朝朝夕；长长长长长消。”过客皆不知所谓。康熙中有一道士到此，读而喜之，众请其说，道士笑曰：“上句第三、第五两朝字读下平声，通作潮；又将下句第三、第五两长字读作上声即得，不过是朝汐长消而已。”

吴门陈竹士之室金纤纤，才女也，著有《瘦吟楼诗稿》。年二十一卒，其女友汪宣秋挽以联云：“入梦想从君，鹤背恐嫌凡骨重；遗真添画我，飞仙可要侍儿扶。”可谓倾倒极矣。竹士继室王梅卿亦工诗，合卺之夕，汪又戏贺一联云：“几生修得到；一日不可无。”雅谑解颐。何吴门之多才女耶！

蔡佛田家贫嗜酒，而性滑稽。当四十九岁时，自集宋句为联云：“四十九年穷不死；三百六日醉如泥。”

某县令姓王名寅，性极贪鄙。有夜题其门一联者，句云：“王好货，不论金银铜铁；寅属虎，全需鸡犬牛羊。”

道光初元，江南有嘲举孝廉方正者，大书于其门云：“曾是以孝，恶能廉；可欺以其方，奚其正。”

王楷堂老于曹郎，家计甚窘，宅近马棚，门临大道。自撰一联悬于门柱云：“马骨峻嶒，吃豆吃麸兼吃草；车声历碌，拉人拉物不拉钱。”

吴江任子湘秀才，为寿板铺春联云：“梦且得官原瑞物；呼之为寿亦佳名。”二句分咏，语殊温雅，可作寿板铺之普通联用。

纪晓岚家中屡为庸医所误，恨之次骨。适有为医家求题扁额者，立书“明远堂”三字与之。或询其说，纪曰：“不行焉，可谓明也已矣；不行焉，可谓远也已矣。此等医生，只当祝其不行，便是无量功德也。”或曰：“然则彼来求联，更将何以应之？”纪曰：“我有撰成五言、七言两联，一系乙转孟襄阳诗字云：‘不明才主弃

；多故病人疏。’一系集唐人诗句：‘新鬼烦冤旧鬼哭；他生未卜此生休。’”问者大笑而去，可谓挖苦极矣。

闽县某君为族中排解一讼事，而有所偏徇，众疑其受私，某力辩不能明。适其乡赛神作灯联，某乃以谑语解嘲云：“烛问灯云：靠汝遮光作门面；鼓对锣曰：亏依空腹受拳头。”

有项某自署其门联云：“一门三学士；四代五尚书。”客见之，疑近代显宦中无此姓，意其先世或居是官，因造门而问焉。项对曰：“吾家父子三人，并弟子员，各占杭州、仁和、钱塘一学；且祖若父生前曾举明经，合四代皆习尚书，故曰一门三学之士、四代有五人习尚书耳，君无读破句别字也。”问者大笑而退。

《明道杂志》云：世传朱全忠作四镇时，与宾佐出游，全忠指一地曰：“此处可建神祠，试召一视地工验之。”而召工久不至，全忠怒甚，见于辞色，左右皆恐。良久工至，全忠指地示之，工再拜贺曰：“此所谓乾上龙尾地，建庙固宜，然非大贵人不能见此地。”全忠喜，薄赐而遣之。工出，宾僚或戏之曰：“若非‘乾上龙尾’，定当‘坎下驴头’矣。”盖东北人谓所伐曰坎也。

沈作喆寓简云：杨文公危言直道，独立一世，嫉恶如仇。在翰苑日，有新幸近臣以邪言进者，意欲攀公入其党中，乘间语公曰：“君子知微知彰，知柔知刚。”公正色疾声答曰：“小人不耻不仁，不畏不义。”幸臣大沮。

古今滑稽联话十一

《金陵琐事》云：顾东桥巡抚湖广时，衙斋菊开，邀数门生赏之。一狂生拣花之好者摘两三枝，戴于头上。东桥不悦，因出对曰：“赏菊客来，两手擘残彭泽景。”张太岳对云：“卖花人过，一肩挑尽洛阳春。”东桥曰：“此语已佳，不必更对矣。”遂酌酒尽欢而罢。

《稗史类编》云：长乐马状元铎，少时梦一人语之曰：“雨打无声鼓子花。”不省所谓。后与同郡林志同举进士，志乡会皆第一，殿试时忽梦马踏其首，以是怏怏，争于上前。上曰：“朕有一对，对佳者状元也。”曰：“风吹不动铃儿草。”马即对以梦语，而志思竭不能对，铎于是得状元。

祝枝山《猥谈》载：梁文康公储髫龄时，随父浴于小沼中，父出对曰：“晚浴池塘，涌动一天星斗。”公对曰：“早登台阁，挽回三代乾坤。”

《晓山堂外纪》云：徐晞既贵，传乘归，守令率诸生郊迎。诸生以其不由科甲出身，玩忽不成礼节，守令因出对云：“擘破石榴，红门中许多酸子。”诸生思久不能对，晞代答云：“咬开银杏，白衣里一个大人。”诸生惊服，遂相率请罪。

又载陆浚明一对云：“棗棘为薪，截断劈开成四束；闾门起屋，移多补少作双间。”构思固巧，而笔画间遂不免稍有假借矣。

黄印《梁溪识小录》云：莫天佑绰号老虎，守无锡时，残忍嗜杀，每出入，人皆走匿。有稚子沈龙者，负笈趋塾，误冲节幢，为所执。天佑曰：“汝为学生，能对乎？”曰：“能。”天佑曰：“有人称我为：‘至勇至刚，能文能武，无上将军’者，汝能对则赏，不能对，断汝头。”龙略不畏惧，整容对曰：“大慈大悲，救苦救难，观音菩萨。”天佑喜，赏银一锭，为之止杀者累月。

又云：明嘉靖间，一内珰衔命入浙，与司北关南户曹、司南关北工曹，及工部郎中某君等饮宴。珰欲侮缙绅，乘酒酣为对云：“南管北关，北管南关，一过手，再过手，受尽四面八方商商贾贾，辛苦东西。”此珰故卑微，曾司内闾，工部君所素识者，因答云：“我须相报，但勿嗔乃可。”遂云：“前掌后门，后掌前门，千磕头，万磕头，叫了几声万岁爷爷娘娘，站立左右。”珰怒愤攘臂，至欲自戕，二司力劝乃止。

《野获编》云：贾宪使实斋以名儒里居，一日雪后披貂裘立门前，有一邻舍少年号倪麻子者，颇少慧，好侮人。贾见其着屐弄雪，呼前曰：“我有一对，汝能属句否？”因曰：“钉鞋踏地泥麻子。”倪曰：“对则能之，但不敢耳。”贾曰：“吾不汝罪。”倪乃对曰：“皮袄披身假畜生。”贾面赤，咄嗟诟詈而入。

又一则云：楚中耿天台定向，为南直提学御史。初莅任，即遣牌往松江山欲观海。时徐文贞少湖为首相，耿其讲学至交，实借此往拜其先祠也。云间士子为之语曰：“名虽观海，实则望湖，耿学使初无定向。”久而未有对者。适河南刘自强为应天尹，以户曹隶不逮，奋拳毆之。刘多力，至折隶齿几死。乃得对曰：“京卿攘臂，衙役折齿，刘府尹果能自强。”同时松江有郡丞潘大泉，名仲骖，以名翰林谪外，傲睨侮人；华亭尹倪先荐者，谦和下士，松江士人又为之对曰：“松江同知恣肆，合得重参；华亭知县清廉，允宜先荐。”各取姓名同音也。

《文行集》云：郑洛书，莆田人，正德丁丑进士，为上海知县。同时永丰聂豹为华亭知县，并有政声。一日同坐察院门，适人来报上海秋试脱科。聂笑曰：“上海秀才下第，只为落书洛书。”郑应声曰：“华亭百姓遭灾，皆因孽报聂豹。”

陈眉公《见闻录》云：西涯李公善谑，居政府时，庶士进见，公曰：“今日诸君试属一对，句曰：‘庭前花始放。’”众哂其易，各漫应之。公曰：“总不如对‘阁下李先生’也。”众一笑而散。

长洲韩慕庐先生莼为秀才时，曾落四等。后登会状，故其家有“四等秀才；一甲进士”门联。当未第时，尝授读蒙馆，而馆主人识丁不多，复强作解事，往往干与馆政，将经书句读点破。韩偶与争，即谓“汝是四等秀才，能得甚事”？韩亦忍受而已。一日，生徒读《曲礼》“临财毋苟得，临难毋苟免”，“毋”字误读作“母”字。有吴中名下士适过门，闻而窃笑，不知是主人所授，非先生意也。遂高声作七字讥之曰：“曲礼一篇无母狗。”令作对语。韩应声曰：“春秋三传有公羊。”其人大服，询姓名而去。或云吴士即健庵先生也。

相传钱虞山有一杖随身，自制铭刻其上云：“用之则行，含之则藏，惟我与尔有是夫。”及入清朝，此杖失去已久，一日忽得之，已有人续铭其旁云：“危而不持，颠而不扶，则将焉用彼相矣。”钱为之惘然。

对句有以文字分合见巧者。某书载陈元孝与梁药亭诸公夜饮唱酬，以“夕夕多良会”对“人人从夜游”。又某公为巡河道，即景云“少水沙即露”对“是土堤方成”。又：“此木成柴山山出；因火为烟夕夕多。”“二人土上坐；一月日边明。”“人从门内闪；公向水边古今滑稽联话（范范）<wbr>[11]。”

某君徘徊溪畔，得一对云：“独立小桥，人影不随流水去。”久无对句。一友闻之，欣然曰：“孤眠旅馆，梦魂曾逐故乡来。”

古人对句，有用口头常语而对仗极工稳者，如：“兔走乌飞，地下相逢评月旦；雁来燕去，途中偶遇说春秋。”又：“杨柳花飞，平地上滚将春去；梧桐叶落，半空中撒下秋来。”

乾隆某年，工部署被火，金尚书简奉命督修。一朝士出对曰：“水部火灾，金司空大兴土木。”久无能对者。适有新选中书科中书某君，状貌魁梧，自负为南人北相。纪文达闻之，慨然曰：“‘南人北相，中书科甚么东西’，可借伊属对矣。”

又，河间某道士娶妻，有作贺联者，先得出句云：“太极两仪生四象。”下句不属。时纪晓岚尚幼，从旁诵苏句足之曰：“春宵一刻值千金。”

某塾师年老健忘，出一对自嘲云：“书生书生问先生，先生先生。”或对：“步快步快追马快，马快马快。”塾师嫌其马快对先生，虚实未称，然舍此亦无佳句也。他如“念兹在兹，释兹在兹，名言兹在兹”对“揭谛揭谛，波罗揭谛，波罗僧揭谛”，亦取其以经对经，灵妙可喜，不必以字句差互绳之也。

某达官延一老诸生教其宠妾某学诗，诸生令先学作对。适斋僮烹茶将熟，因以“茶声”二字命对，妾应声曰“酒色”，诸生为之匿笑。

吉林某氏弟兄，同时为江浙民政长，凡有优差美缺，无不位置亲戚故旧、同乡僚属。当时有人以联语嘲之云：“好官自为之，试看半壁东南，难兄难弟同开府；居上后来者，从此一班龌龊，议亲议故尽弹冠。”

某邑史茂才性喜诙谐，适邻居有一医生尤姓，年老讳言死。一日史戏之曰：“尤郎中直脚便为犬。”医生大怒，几欲挥拳。茂才曰：“子母然，看我对来。”因自嘲云：“史先生脱口不成人。”

泰州某校算术教员程度不甚高，平日对于学生严厉无比。此次四年级生毕业，某生特书一联于该教员卧室门上，其联云：“上数次讲堂，板板居然六十四；演几条算术，真真活出么二三。”

纪晓岚《滦阳消夏录》云：冀宁道赵公署中有两幕客，一姓乔，一姓车，合雇一骡轿回籍。赵公戏以其姓作对曰：“车乔二幕客，各乘半轿而行。”恰皆轿之半字也。时署中召仙，即举以请对。乩判曰：“此是实人实事，非可强凑而成。”越半载，又召仙，乩忽判曰：“前对吾已得之矣：‘卢马两书生，共引一驴而走。’”又判曰：“四日后辰巳之间，往南门外候之。”至期遣役侦视，果有卢、马两生，以一驴负新科墨卷，赴会城出售。赵公曰：“巧则诚巧，然两生之受侮深矣。”此所谓箭在弦上，不得不发，虽仙人亦忍俊不禁也。

贺耦庚中丞有一对云：“天近山头，行到山腰天更远；月浮水面，捞将水底月还沈。”眼前光景，说来殊有理致。

“鸡犬过霜桥，一路梅花竹叶。”此古人绝对也。缪莲仙以“燕莺穿绣幕，半窗玉

剪金梭”对之，字面虽尚工稳，然非天然之景矣。

徐兴公《榕阴新检》载：林太史某善雅谑，尝戏鼓山僧瑶公云：“风吹罗汉摇和尚。”瑶应声曰：“雨打金刚淋大人。”

嘉兴夏绿树君，闻余编《滑稽联话》，寄示古人巧对多则，不知所据何书。姑录如下：一云唐六如尝出对曰：“眼前一簇园林，谁家庄子。”陈白杨对曰：“壁上几行文字，那个汉书。”一云有偶见篱边两犬相视者，因取卦名作对云：“大畜革离篱观小畜；家人临困睡也涣唤同人。”一云某君偕友至家，值其妹在窗前扞虱，因出对云：“小妹窗前捉半风。”妹应声曰：“阿兄门外邀双月。”一云蜀中有一奇童应试，太守见其袖底有红花一朵，乃出对云：“书生袖里携花，暗藏春色。”童对云：“太守堂前秉鉴，明察秋毫。”一云通州项炯，幼时随其师舟行，见云起不雨，师出对曰：“密云不雨，通州水不通州。”对云：“钜野有秋，即墨田多积麦。”一云徐阶幼时应考，适风吹鹊巢落地，宗师命对云：“风落鹊巢，二三子连窠及地。”徐对云：“雨淋猿穴，众诸侯待漏朝天。”一云万安幼时，有客出对曰：“日出东，月出西，天上生成明字。”万对云：“子居左，女居右，世间定配好人。”一云林大钦幼时喜作大言，师出对云：“议论吞天口。”大钦对曰：“功名志士心。”一云唐伯虎与友人闲行郊野，即景得句云：“嫂扫乱柴呼叔束。”友对云：“姨移破桶令姑箍。”一云有塾师出对云：“论语二十篇，惟乡党篇无子曰。”一童子对云：“周易六四卦，独乾坤卦有文言。”以上诸对，虽各有巧思，然其细已甚矣。

清季长沙某太史，将东狱庙改为小学堂，兼课西文。好事者撰一联云：“东岳庙菩萨搬家，直向奈何天去；西学堂翰林董事，如在华胥国中。”

某县令与某观察，均以捐班出身，同当某局差使。观察好讲体制，见面时如“大人”、“卑职”等称呼，偶一疏忽，辄瞪目以示不悛。令厌苦之，戏缀一联于门云：“什么大人，同是一张皮纸；可怜卑职，只少几两纹银。”

或嘲嗜鸦片烟者联云：“一榻长眠，那管他地裂山崩，海枯石烂；半生虚度，总有日烟消火灭，灯尽油干。”

某处潘、何二姓结婚，或贺以联云：“有水有田兼有米；添人添口又添丁。”又某书载寿孟母何氏一联，嵌姓亦稳。联云：“人间贤母公推孟；天上仙姑本姓何。”

萧山某秀才于中秋日下世，其友顾朴斋挽以联云：“去年在棘闱里，今年在棺材里，两个中秋，两般过法；有命到泮水边，无命到云路边，一场大梦，一笔勾消。”

某书载彭刚直哭子一联，语多不经，恐系伪托，姑录之以质知者。联云：“怎能够

踏破天门，直到三千界，请南斗星、北斗星，益寿延年将簿改；恨不得踢翻地岳，闯入十八重，问东岳庙、西岳庙，舍生拚死要儿回。”

西湖无祀木主庙有一联，自叹自慰，足为穷鬼解嘲，不知何人手笔也。联云：“咳！可怜穷性命做鬼无依，禁不住放声大哭，苦雨凄风，萤火三更摇惨碧；呸！你看好儿孙克家有几，到不如异姓同堂，秋霜春露，义田万古荐馨香。”

某君题城隍庙联云：“你的算计非凡，得一步，进一步，谁知满盘都是错；我却糊涂不过，有几件，记几件，从来结帐总无差。”又杨兰坡题倒坐观音像云：“问大士缘何倒坐；恨世人不肯回头。”

寿联皆铺张雕绘，求其颂无溢美者，盖不可多得。番禺许拜庭封翁，五代同堂。孟蒲生孝廉赠以联云：“事祖事父，祖事祖事父，父事祖事父；有子有孙，子有子有孙，孙有子有孙。”如此大题，不赞一辞，真白描之好手也。使骋才使气者为之，必将乱填故实，闹成许多浮话矣。

古今滑稽联话十二

西湖花神庙叠字联，生面别开，脍炙人口，本编已录入之。顷又于友人处得吴中网师园一联，写当时艳冶风流之景，如在目前，亦佳构也。联云：“风风雨雨，暖暖寒寒，处处寻寻觅觅；莺莺燕燕，花花叶叶，卿卿暮暮朝朝。”又某书载上海豫园旧有僧寄尘所题一联云：“莺莺燕燕，翠翠红红，处处融融冶冶；风风雨雨，花花草草，年年暮暮朝朝。”

苏州新修沧浪亭成，应敏斋廉访题一联，语甚超脱，亦极浑成。联云：“小子听之，濯足濯缨皆自取；先生醉矣，一邱一壑自陶然。”

“青春鹦鹉，杨柳楼台。”司空表圣《诗品》句也。陈曼生司马集二句对云：“绿绮凤凰，梧桐庭院。”注云：“张子野词。”请梁山舟学士为书楹帖，学士爱其工丽，欣然书之。后遍查子野词，并无此二句，盖竟属司马杜撰云。才人好事，亦趣闻也。

光绪己丑恩科，殷如璋、周锡恩典试浙江。浙人某太史请假在籍，因与殷有年谊，以私函具万两银票，为某某等及其子六人通关节，约于试帖尾联用皇、仁、茂、育四字。遣粗工某赍函至苏州投递。时两主试泊舟阊门外，副主考方过正主考船中闲话，殷公得信，暂度一旁，谈笑如常。而副主考久坐不去，送信人不耐，哗曰：“似此万金干系，岂并不给回信耶？”副主考乃攫来信阅之，殷不能隐，因执送信人发苏州府讯问，奏参某太史革职逮捕。杭人为作联云：“年谊藉夤缘，稳计万金通手脚；皇仁空茂育，伤心一信送头颅。”又讥两主考云：“殷礼不足征，既已如聩如聋，安识文章量玉尺；周任有言曰，难得恩科恩榜，早来交易度金针。”按杭人好事者每科必有对联，嵌主试姓名，语皆嘲讽，即无口实可藉者，亦必循例为之。如“庄梦未知何日醒；鞠花从此不须开”等，余已汇录于前矣。又有乌达峰尚书与恽次远侍郎典试时一联云：“乌之不如，只为胸中无点墨；军原可夺，岂知身外有偏心。”达峰文名本逊，上联语出有因；恽则但切姓氏而已。

又，梁晋竹《两般秋雨盦随笔》载：谢金圃、吴玉纶、德定圃保、沈云椒初，典试颇不满于众口，或作对云：“谢金圃抽身便讨；吴玉纶倒口就吞。”“德定圃人傍呆立；沈云椒衣里藏刀。”双关拆字，亦殊巧不可阶。

又，某书载江右某君嘲梁仲衡云：“不用文章分伯仲；全凭阿堵定权衡。”媿以匾曰“梁上君子”。

“子建之才八斗，我得一斗，天下共分一斗。”论斗分才，奇矣。《西堂杂俎》载汤卿谋句云：“古今只有万斛愁，而我独得九千斛。”论斛分愁，更奇。有曹姓人为彭泽令，其友人赠一对云：“二分山色三分水；五斗功名八斗才。”运典恰切。

公牒中字义有不可解者。查，浮木也，今云查理、查勘，有切实义；吊，伤也、愍也，今云吊卷、吊册，有索取义；绰，宽也，今云巡绰、查绰，有严紧义。当有所本，未之考也。嘉应杨滋圃游幕南阳，戏作楹帖云：“劳形于详验关咨移檄牒；寓目在钦蒙奉准据为承。”亦所谓以不解解之也。又州县署中向有口号曰：“卑职小的何日了；等因奉此几时休。”亦趣。

浙人某君，咸丰中在都供职，颇不理于众口。达官陈公为某君座师，值丧偶，某君挽联有“丧师妣如丧我妣”之语，一时传为笑柄。又许滇生尚书患病，某君遣其夫人数往问疾，人亦讥其不避嫌疑。因撰联语云：“昔岁入陈，寝苫枕块；昭兹来许，抱衾与裯。”可谓谑而虐矣。

历城汪蘅舫以名进士出宰州县，所至有政声，而遭逢佗僚，终于邑侯。尝再任临川，撰一联自嘲云：“鳧舄重来丁令鹤；牛刀再割子游鸡。”最后任南昌首县颇久。光绪乙酉，德晓峰中丞初莅豫章，监临乡闱，甚器重之。闱场例设供给所，由两首县督办。某日内监试处，应进猪肉缺少三斤，司事开条飭补，因江西省肆每书猪肉为亥，遂从俗书“亥三斤”。蘅舫又作联曰：“大中丞遇事包容，见面未碰了一个；内监试多方挑剔，关心惟在亥三斤。”一时传为笑柄云。

吴清卿开府湖南，讲求武备，尝系近视镜演放洋枪，能命中于百步之外，沾沾自喜，以为虽古名将不如也。中东事起，请缨北上，统军至朝鲜界，一战而溃。时常熟当国，以乡谊故竭力周旋，得免严谴，仍回湖南本任。湘人作联云：“一去本无奇，多少头颅抛塞北；再来真不值，有何面目见江东。”湘军素有威名，是役无尺寸之功，而生还者殊少，宜湘人之怨之也。

有妓女欲取堂名，某君为题“介福”二字，并系以联曰：“甚么人家，全靠两条大腿；有何衣禄，只凭一口低田。”“介福”二字本无恶义，而一经诠释，令人捧腹矣。

联有暗嵌字面，似褒实贬者，粗心人往往忽之。安徽宋某，官于浙，某巨公赠联云：“大宋文章，小宋经济；之江循吏，皖江名儒。”扁额曰“公生明”。宋得之大喜，常诵于人，识者皆忍俊不禁。盖联中两嵌“宋江”字，而额又申明之，宋竟不察，反以为荣，真莽夫矣。

清季，粤西朱绍霞为南昌令，中丞藩臬皆信任之，凡委州县缺，必由绍霞先为拟议，而后院司见诸施行。群指南昌县署为下议院，于是植党营私，擅作威福。同官曾某，因公事少与龃龉，即设法使离去之。有石某者，因趋附绍霞，得委优缺。时人为作联曰：“曾忽见憎，只为良心犹未昧；石将成跖，居然捷足许先登。”

某中丞初以微员筮仕直隶，官西路厅司狱，洊保知县，升昌平州、天津府、登莱青

道，遂跻两司，抚湖北，监临文闱。时人作联嘲之曰：“监生作监临，斯文扫地；巡检升巡抚，脉理通天。”盖君善医理，尝召入宁寿宫，为西太后诊脉，以是受知，故官阶特顺云。

纪上则竟，忆某书载，乾隆时萍乡刘金门宫保代办某科监临，以细故亲坐堂，答责号军；又诸生交卷时，宫保索阅其文，有未妥处，亲为指正，飭令更改。时人亦有一联语，颇相类上则，或即从此脱胎也。联云：“监临打监军，小题大做；文宗改文字，矮屋长枪。”按宫保以探花及第，尝视学吾浙。按试台州时，阮文达为巡抚，亦以巡阅至台，相约同游天台山，题“刘阮重来”字于石壁。韵人韵事，今浙人犹艳称之也。

丁戊生《小联话》载：某君赠沪滨冶叶小脚阿毛一联，寥寥十四字，形容其美，切合其名。而一般登徒子之消魂真个，亦跃跃如见，可风可警，洵佳构也。联云：“万古云霄珍片羽；几人性命等轻鸿。”

云间吴太史某，少年登第，其封翁尚困于小试。泥金报至，贺客盈堂，封翁戏题一联云：“谁谓进士难，小儿取之如拾芥；莫道秀才易，老夫望之若登天。”

前清泉唐朱太史某，未第时，为叔婢多多写团扇，录宫词于上，为叔所见，谓太史曰：“汝爱多多，待汝登第后当以为媵。”既而采芹攀桂，连捷南宫，乞假归，悬叔践约。叔曰：“汝以多多二字作一联为聘，可乎？”太史立成“一心只念波罗蜜；三祝难忘福寿男。”十四字。叔大喜，即日命多多归之。事见某君笔记。

明思宗时，一谢姓侍郎请假省亲，上问：“卿家中有几口？”对曰：“父母妻子共四口。”上出对曰：“四口心思，思父思母思妻子。”侍郎即应声对曰：“寸身言谢，谢天谢地谢君王。”

乐生恶死，人之常情也，故谚曰“好死不如恶活”。清季一诸生，以困于场屋，授徒终老，作联自挽云：“这回吃亏受苦，都因入孔氏牢门，坐冷板凳，作老猢猻，枉说顶上加高，竟挨到头童齿豁，两袖空空，书呆子毫无生趣；此去喜地欢天，必须走孟婆村道，看尖刀山，浴血污池，也算眼前乐境，再和些酒鬼诗魔，一堂叙叙，阴秀才着实开心。”是乐死而恶生矣，较之西国人之“不自由，毋宁死”，为更进一筹也，一笑。

“细柳何细哉，腰细眉细凌波细，且喜心思更细；高郎诚高矣，品高志高文字高，但愿寿数尤高。”此《聊斋志异》细柳娘与其夫高生之戏对也。意思颇佳，不徒以字面之组织工妙见长也。近人有名高浓者，仿而赠妓好卿云：“好卿真好哉，身材好，举止好，体肤内尤好。”好卿亦仿而对云：“浓君诚浓矣，情意浓，言语浓，衾席上更浓。”婢学夫人，雅俗判如霄壤。

吴步韩早衰善病，年五十，已如六七十岁人。有自寿一联，颇旷达有趣。联云：“学昌黎百无他长，只这般视茫茫，发苍苍，齿牙动摇；慕庄周万有一似，可能够梦蘧蘧，觉栩栩，色相皆空。”上只切名，下只对仗亦好。

作寿联者伙矣，或自寿，或寿人，从未闻有父而寿子者。往岁樊樊山之子令某邑，值年五十，樊老给以联曰：“我亦痴翁，愿再抚汝五十年，寿汝乎，抑自寿也；身临大邑，岂独有民数万户，保民者，则天保之。”亦庄亦谐，亦创见也。

西湖飞来峰冷泉亭，旧有董香光联云：“泉自几时冷起；峰从何处飞来。”某君更作转语云：“泉自冷时冷起；峰从飞处飞来。”禅语作联，颇有妙悟。

李济华赠友联云：“事到眼前皆雪亮；人如足下亦风流。”以“眼前”对“足下”，极灵活。

赠妓之联多尚嵌字，钩心斗角，抽秘骋妍，颇有令人发笑者。如赠爱依云：“不才谢多娇错爱；外间大有人图依。”采珠云：“欲采不采隔秋水；大珠小珠落玉盘。”盼仙云：“明月不来盼复盼；好花如笑仙乎仙。”莲卿云：“管甚莲似郎好，郎似莲好；为问卿怜我多，我怜卿多。”喜凤云：“这般可喜娘罕曾见；遇着那凤姐出了神。”水子云：“水哉水哉，胡然而天也，胡然而帝也；子兮子兮，如此良人何，如此良夜何。”又有不用明嵌者，尤滑稽蕴藉，令人绝倒。赠阿毛云：“杨子拔一而不可；宋襄禽二又何妨。”小桃云：“卿是武陵源消恨种子；我乃东方生滑稽之流。”

王文濡《联对大全》载无名氏自题门联云：“阳多匪，阴多鬼，我亦尘埃同靡靡，其呼我为牛马乎，唯唯；醉里卧，梦里歌，尔胡冠带犹峨峨，行将尔作牺牲矣，呵呵。”和光同尘，曳尾泥涂，作者殆老庄之流亚欤！

四书集对，昉自清初。相传吴梅村过访某公，某适著《四书讲义》，至《孟子》将朝王章，未能下笔，面有愠色。吴云：“夫子若有不豫色然。”某曰：“先生何为出此言也。”相与抚掌大笑，竟夕成《四书对语》一册。其书今不传，兹选缪莲仙等所集若干则，以备一格。三言云：“笑百步；拔一毛。”“天作孽；人不知。”四言云：“哀此螽独；反其旄倪。”“好行小惠；则乱大谋。”“我虽不敏；王请勿疑。”五言云：“何如其知也；无乃为佞乎。”“犹为弃井也；宜若登天然。”“得众则得国；有土此有财。”“人病不求耳；女安则为之。”“季康子患盗；齐宣王问卿。”六言云：“非直为观美也；又从而礼貌之。”“今有璞玉于此；吾岂匏瓜也哉。”七言云：“百官牛羊仓廩备；园囿污池沛泽多。”“鱼鳖不可胜食也；牛羊又从而牧之。”“求水火无弗与者；于禽兽又何难焉。”“曰士师不能治士；由弓人而耻为弓。”“人亦孰不欲富贵；水信无分于东西。”“人未有自致者也；我不识能至否乎。”八言云：“故曰尔为尔，我为我；信如君不君，臣不臣。”

“未有小人而仁者也；然则夫子既圣矣乎。”“毋意毋必，毋固毋我；如切如磋，如琢如磨。”九言云：“王顺长息，则事我者也；管仲晏子，犹不足为与。”十言云：“杀之而不怨，利之而不庸；安而后能虑，虑而后能得。”十二言云：“博也厚也，高也明也，悠也久也；劳之来之，匡之直之，辅之翼之。”“身修而后家齐，家齐而后国治；天时不如地利，地利不如人和。”

古今滑稽联话十三

谚语各处皆有，多古人经验之言，即小可以悟大。周遵道《豹隐记谭》、郎瑛《七修类稿》、沈德符《野获编》、冯犹龙《谈概》、缪良《文章游戏》、寅半生《天花乱坠》，及近日坊间所出各种楹联书等，载浙谚集对甚伙，惟工而能趣者少。兹汇录自二言至十三言各数则如下，存什一于千百也。“散福；道喜。”“笔直；镜光。”“老辣；寒酸。”“藤韧；索脆。”“倒灶；坍台。”“收拾；放肆。”“雪亮；风流。”“挖天窗；打地洞。”“揆菜蔬；龃瓜皮。”“养雄鹅；看老鸭。”“戴炭箬；拖油瓶。”“倒庙角；爬山头。”“烂屁股；贱骨头。”“小结构；大排场。”“隔壁富；转湾亲。”“赔眼泪；修肚皮。”“臭老鼠；贱骆驼。”“吃食户；讨饭坯。”“望门寡；搁笔穷。”“看看看；来来来。”“咬耳朵；打嘴巴。”“白果眼；香瓜头。”“娇嫡嫡；腐腾腾。”“泥菩萨；瓦将军。”“尖头蚱蜢；长脚鹭鸶。”“豆腐架子；灯草拐儿。”“手忙脚乱；目定口呆。”“麻皮擦痒；豆腐开荤。”“快活公子；邋遢婆娘。”“吹糠见米；脱裤换糖。”“冤哉枉也；古而怪之。”“花脸和尚；草头郎中。”“见风使帆；挑雪填井。”“糊高头壁；穿俗脚裤。”“狗头军师；猫脚女婿。”“引狗入寨；调虎离山。”“悬空八只脚；倚出三画须。”“小狗落污坑；曲蟮游太湖。”“蛤蟆填床脚；蝼蚁扛耆头。”“滚汤泼老鼠；砵糠换小狗。”“苍蝇跟雁鹅；老虎舐蝴蝶。”“毛头小伙子；瘪嘴老太婆。”“毛头小伙子；空心大老官。”“懒人试重担；穷汉养娇儿。”“饿鬼抢羹饭；老虎拖蓑衣。”“灶山上跑马；火筒裹煨鳗。”“舌头上打滚；脚底里搽油。”“顺口波罗蜜；随手萨摩诃。”“口甜心里苦；眼饱肚中饥。”“若要宽，先了官；教得会，不做队。”“山门前骂贼秃；毛坑头跳加官。”“井栏圈当班指；灯笼壳做枕头。”“寒虫鸣，懒妇惊；喜鹊叫，远人到。”“贼不偷，鸪摇头；婆欢喜，公中意。”“单怕忘八打官话；只见和尚吃馒头。”“吃了五谷想六谷；把得千钱要万钱。”“好看好看真好看；不通不通又不通。”“吃的是鸡头鸡脚；晓得你狗心狗肝。”“死棋肚里有仙着；强将手下无弱兵。”“笔管里煨鳅直死；墙头上种菜没缘。”“拳头上立得人起；棺材里伸出手来。”“缺嘴里咬跳蚤；痢痢头上拍苍蝇。”“事不关心，关心者乱；人无下贱，下贱自生。”“穷和尚遇着急门徒；熟皂隶打得重板子。”“近朱者赤，近墨者黑；久病成医，久嫖成龟。”“叫化子骑马零碎多；产妇娘撒屁孩儿气。”“若要俏，冻的装鬼叫；没得忧，买间破屋修。”“强盗画喜容，贼形难看；阎王出告示，鬼话连篇。”“不管你娘的娘，爷的爷；弄得来死不死，活不活。”“脚趾头抓三抓也是令；眼睛梢带一带便有颜。”“各人各法，各庙各菩萨；讴爹讴娘，讴屈讴地方。”“叫化子吃死蟹，双双好的；老道士放急屁，句句真言。”“蚂蝗钉了鹭鸶脚，无血也不放；蜻蜓飞入蜘蛛网，有命总难逃。”“多得不如少得，少得不如现得；大事化为小事，小事化为无事。”“脚不定，手不定，胎里做成老毛病；这边羞，那边羞，脸上挂片大猪油。”“公一碗，婆一碗，姑娘嫂嫂合一碗；新三年，旧三年，补补衲衲又三年。”“腊月廿三日谢灶司，要早不得早；大年三十夜卖门神，再迟无可迟。”